

Pɔɔlu kadasi bo i kerε fa maari ROMAFOM ni

¹ Mini Pɔɔlu sukεε ahin kadasi n fa ma am a. M ti Yesu Kristo akɔɔ ɔ, ye wɔ fere m ka m kaaki i jaramasa, na wɔ yi m ka m kan labari kpa n bo i fite Nyεmε dɔ n jɔrε. ² Nyini labari kpa n ye Nyεmε yo seeri ka i fá ma ya n a, na wɔ ma i nɔaniε kanfɔm akεrε i ηusu jɔrε ase i jɔrε kadasi n nu. ³ Nyini labari kpa n kere ya i Wa n jɔrε wɔ, nzen ya niε i fa kɔ i adamande dεε woowa su, bu yo wuuri i fiteeri Fεmε Davidi dεε busu n nu n wɔ. ⁴ Ama, kabo Nyεmε faari i yiko tengeeri i yiwee nu ni, nyini ma Awiewie Casi n kere ka i ti Nyεmε Wa a, yiri la ya Mibiε Yesu Kristo ni. ⁵ Yiri dεε ti, ma di Nyεmε ahɔrɔma, ye wɔ ma ma yo i jaramasa, adena i duma n dεε ti, na m ma daanfie barasu kere de i nɔaniε ni, na bu yo i yarada. ⁶ Ambere Romafɔm gusu, am wo nyini minem bo Nyεmε afere bu n nu wɔ, ka am kaaki Yesu Kristo dεε minem. ⁷ Tɔ, ambere bo am wo Roma miε kpiri n nu ni, ye m sukεrε ahin kadasi n ma am a. Ambere bo Nyεmε koro am na wɔ fere am na am ayo i dεε minem ni, ya Si Nyεmε ni ya Mibiε Yesu Kristo ma am wura bu ahɔrɔma nu na am nya ahoreda.

Kabo má Pɔɔlu koroori ka i kɔ niε Romafɔm busu ni

⁸ Ciciri su, Yesu Kristo dεε ti, m da m Nyεmε asi ma am kerε, dama durunya n nufɔm kerε ati

kabo am ayo Yesu Kristo yarada ni. ⁹ Nyeme bo m su i ni m ahorembaa kun ni, na m kan i Wa n labari kpa n jore ni, yiri di m daani a, kabo m nati sere Nyeme ma am ni. ¹⁰ Sanga kere m sere i wo, ka nzen i ti i dee koroyanu, i teke atin ma m kisa, na i awieeri su na m koro ba nie am busu. ¹¹ Dama m nyunu aboro ka m ba nu am wo, adena m fa aceeri n bo i fite Awiewie Casi n do ba ma am na am koro jina fanga kenken ni nyemesu ni. ¹² Nahore, i ti deke bo ya fa ma ya bengu na ya nya ahoresi wo, m ni ambere kere, kabo ya yo Yesu yarada n dee ti.

¹³ M ninbaam, m koro ka am si ka sanga kere, ma m koro ka m ba nie am busu wo, ama, m nya ma atin. Ma m koro ka m ba nya mine am nu ma Nyeme wo, kabo ma nya am bengu nbem bo bu ti ma Yudafo m ni. ¹⁴ Dama wo yo daka ka m yo so ma mine barasu kere, bo bu nyunu ateke, ni bo bu nyunu ateke ma, ni bo ba sanson kara, ni bo ba sanson ma kara. ¹⁵ Nyini dee ti, ye m ahore abi ka m ba kan labari kpa n jore kere ambere gusu bo am wo Roma mie kpiri n nu n a.

Yiko bo i wo labari kpa n nu ni

¹⁶ Nyinse ti ma m fa ko labari kpa n su, dama yiri ti Nyeme yiko bo i ma sono kere bo i yo yarada n nya tiide a, bo bu ti Yudafo m ni du mo a, na bo bu ti ma Yudafo m n nya to su. ¹⁷ Labari kpa n kere kabo Nyeme de sono ka i yo sa bo i ko atin su i do a. Sono kere bo i yo yarada, i fite i yaradayo n dee ti ye Nyeme de i mi ka i yo sa bo i ko atin su i do a, na nyini ma i yarada n yo biiwa. Kabo ba kere i Nyeme jore

Kadasi n nu ka, Nyeme na, “Sono bo i yo sa bo i ko atin su m do, i nya ngoo, i yarada n dee ti.”

Kabo adamande kere ayo satie ni

¹⁸ Nyeme wo angoro akere kabo wo fa yaa acin minem sui ni, bere bo bu sunsunni ti tie na bu yo satie ni, bu satie n dee ti, ba kete ka ma minem si Nyeme nahore su. ¹⁹ Deke bo i ti na wo fa yaa n la ka, ba nu deke n kere bo i ma bu si Nyeme ni, dama yiri ni i tii ayi i kpain afite fofoe nu. ²⁰ Fite sanja bo Nyeme yiiri durunya n ba juuri ni kisa, mine anu i woowa, i ti ma ka bu nyumbaa anu i kabo i ti barasu wo, ama, ba nu dekem bo wo yi bu ni. Nyini dekem ni kere ka i ti Nyeme nahore su a, ni kabo i la yiko bo i la ma awieeri ni. Nyini ti, be wo ma bere bo i koro se ka i si ma i. ²¹ Haari ni bo bu si i n kere, ba kete ka bu ma ma i jirima ka i ti Nyeme, na bu kaaki da ma i asi. Nyini dee ti, ye bu sunsunni kere aka ngbeen ye ngonle akpie bu su, ye bu ahorembaa ayo biri n a. ²² Bu bu bu nu ka bu ti ngonlefom wo, ama, bu ti sinnzinm wo. ²³ Jirima bo ma bu fa ma Nyeme bo i wo bere sanja kere ni, ba fa ama amoem bo ba yo bu na bu ferema ni adamandem, ni lanjketefom, ni ajaannam, ni cinbukunnusufom wo.

²⁴ Nyini dee ti, ye Nyeme ayaki bu ye bu yo bu kunnu koroowa n a, na bu suyo dangba sam bu nu nu suwura bu nu nyinse. ²⁵ Dama ba kete Nyeme nahorefom ni, na bu nya susu kore su. Na bu su dekem bo Nyeme ayi bu ni, bu su ma yiri bo i yiiri deke n kere ni. Yiri dee la kansi sanja kere a. Ami. ²⁶ Ba kete Nyeme n dee ti,

ye wɔ yaki bu a, na bu suyo nyinse sam kabo bu kunnu koro n a, haari na nbaram yaki nbiesom do daari, na bu sufa bu benggu nbaram da, na bu yo kabo ma wɔ yo ma daka ka bu yo ni. ²⁷ Na nbiesom n gusu yaki nbaram do daari, na bu la konviki agaya fa ko bu benggu nbiesom do, na bu ni bere sanja da ka bara ni bieso de su. Nyini nyinse sam de ti, ye ba nya suicin kabo wɔ yo daka ka bu nya i n a.

²⁸ Kabo ba kete ka bu si ma Nyeme ni, nyini ma wɔ yaki bu, ye bu sunsunni tie n ma bu yo sa bo ma wɔ yo ma daka ka bu yo i n a. ²⁹ Bu ahorembaa ayi ni satie barasu kere ngumi wɔ, bu konviki wura bu benggu nengem nu wɔ, na bu suyo bu bengum tie, na bu susi bu bengum kore, na bu sukun bu bengum, na bu sudi aluwa, na bu sudadaka bu bengum, na bu sukpo bu bengum, na bu sukan bu bengum jore, ³⁰ na bu susaaki bu bengum duma, na bu sukpo Nyeme, na bu sukpie bu bengum nzuko, na bu la karambani, na bu sufɔ, na bu susunsun kabo bu yo na bu yo satiem, na bu sukete bu wufom noanie, ³¹ na bu la ma ngonle, na bu yo ma sa bo ba se ka bu yo i ni, na bu koro ma minem, na bu si ma bu bengum anunfo. ³² Bu si kabo Nyeme akere ka, sono kere bo i nati yo so, wɔ yo daka ka i mi wu ni, haari ni nyini mmoo, bu toko yo nyini sam wɔ, ama, bo i ko tara i kere n la ka, bu jina mine bo bu gusu nati yo nyini sam ni sin wɔ.

2

Kabo Nyeme ba di sono kere jore barasu ni

¹ Tɔ, wɔrɔ kɛrɛ bo a kan nyini minɛm jɔrɛ ni, a la mǎ kabo a yo na a kan fite nu Nyɛmɛ dɔ. Dama jɔrɛ n bo a kan jaraki u bɛngu na wɔrɔ ni u tii yo nyini sam ni, nyini ma a kan jaraki u ŋu n a. ² Ya si kabo Nyɛmɛ di minɛm kɛrɛ bo bu yo sɔ n jɔrɛ, na i jaraki bu ni, i jɔrɛ diiwa n ti nahɔrɛ wɔ. ³ Ye wɔrɔ kɛrɛ bo a kan minɛm n bo bu yo nyini sam n jɔrɛ jaraki bu, na wɔrɔ mmɔɔ ni u tii yo sɔ ni, a sunsun ka a koro fite Nyɛmɛ jɔrɛ diiwa n nu, nzen sɛ? ⁴ Kabo Nyɛmɛ ayo sakpa bambaka ama u na i la mindi ni sawɔrɛ ni, nzu ti ye a bu i ŋgbɛɛn a? A si mǎ ka deke bo i ti na i yoori nyini sakpa n la ka, i koro ka a kaaki u wo wɔ, nzen sɛ? ⁵ Ama, kabo a yo u ahorembaa kekereke na a kete ka a kaaki mǎ u wo ni, a sukɓini suicin ma u ŋu wɔ lɛɛ, cɛɛn n bo Nyɛmɛ bá di minɛm jɔrɛ nahɔrɛ su, na i cín bu sui na sonɔ kɛrɛ ŋú i ni. ⁶ Na i tó sonɔ kɛrɛ ŋkatɔ kabo i sayoowa ti barasu. ⁷ Mine nbem dɛɛ la ka, bu mindi nati yo sakpa, na bu kpini kansi, ni jirima, ni aɓuniɛmbaa bo i kpɔrɔ mǎ n busu ni, bɛrɛ ye Nyɛmɛ mǎ bu ŋgɔɔ bo i la mǎ awieeri n a. ⁸ Ama, minɛm bo bu nati yo anyii sam, na bu kete deke kɛrɛ bo i kɔ atin su Nyɛmɛ dɔ, na bu su satie atin su ni, bɛrɛ ye Nyɛmɛ fá yaa bu ŋu na i cín bu sui n a. ⁹ Minɛm kɛrɛ bo bu nati yo satie ni, bu dí wahara na bu ŋú anyumboro, bo bu ti Yudafom ni dú mɔ ŋu nyini kekereke n a, na bo bu ti mǎ Yudafom gusu nyá tɔ su. ¹⁰ Ama, minɛm kɛrɛ bo bu nati yo sakpa ni, Nyɛmɛ mǎ bu nya kansi ni jirima ni ahoreda, bo bu ti Yudafom ni dú mɔ nya nyini deke kpam n a, na bo bu ti mǎ Yudafom n gusu nyá tɔ su.

¹¹ Dama Nyeme tambu má nu.

¹² Minem kere bo bu la má Nyeme noanie kpamaawa n na bu yoori satie, bu ka ngbeen, haari ni bo bu la má Nyeme noanie kpamaawa n ni. Na minem kere bo bu la Nyeme noanie kpamaawa n na bu yoori satie, bere ye Nyeme fa i noanie kpamaawa n di bu jore, na i bo bu asi a. ¹³ Má minem bo bu sui ti Nyeme noanie kpamaawa ni ye Nyeme de bu ka bu yo sa bo i ko atin su i do a. Ama, bo bu yo kabo Nyeme noanie kpamaawa n kere ni, bere ye Nyeme de bu ka bu yo sa bo i ko atin su i do a. ¹⁴ Minem bo bu ti má Yudafo m na bu la má Nyeme noanie kpamaawa ni, ama, na bu yo kabo noanie n kere ni, bu sunsunni ni bu ahorembaa kpa n dee ti, bere ni bu tii akpama noanie ama bu nu lee. ¹⁵ Kabo ba de i so ni, nyini kere ka Nyeme noanie kpamaawa n wo bu ahore su a, na bu sunsunni gusu kere ka i ti so o, na i kaaki jarki bu ka ba yo sa bo i ko má atin su, wara i koro jina bu sin ka ba yo sa bo i ko atin su. ¹⁶ Nyini kere yo een bo Nyeme má Yesu Kristo ba di adamande kere jore bo i wo asiri nu n wo. M labari kpa n bo m kan i kere mine ni, kabo m kere i lee.

Yudafo m ni Nyeme noanie kpamaawa n jore

¹⁷ Ambere bo am na am ti Yudafo m, na am daafi Nyeme noanie kpamaawa n nu, na am fa fo ka am si Nyeme ni, ¹⁸ na am si kabo Nyeme koroowa ti, na am sunsun nyunyumi, na am yi sa bo i ti kpa, dama am asi Nyeme noanie kpamaawa n kere awie, ¹⁹ am yo am nu ka ambere bita anyinsinm kpama a, na am ti wein

ma minem bo bu wo awosin nu ni. ²⁰ Am na amberε teke minem bo bu la má ngonle nyi a, na am kaaki kere minem bo bu ti ka nbaatumam ni, dama am na am si Nyeme noanie kpamaawa n dεε ti, am sunsun ka am si ngonle ni nahore kere bo i wo i nu ni. ²¹ Amberε bo am kere minem ni, nzu ti ye am kere má am na a? Ye amberε bo am se minem ka má bu wo ni, am wo, nzen am wo má? ²² Am na má be saaki ajaa ciire ni, ye am saaki i, nzen am saaki má i? Am na am koro má amoe jore ni, ye am wo nengem amoe soom n nu, nzen am wo má? ²³ Amberε bo am bita Nyeme noanie kpamaawa n fa fo ka am si i, na am su má i su ni, amberε kaaki wura Nyeme nyinse a. ²⁴ Kabo ba kere i Nyeme Jore Kadasi n nu ni, ka, “Amberε Yudafoam dεε ti, ye minem bo bu ti má Yudafoam joro wura Nyeme ngasi nu a.”

²⁵ Nzen am yo kabo Nyeme noanie kpamaawa n kere ka am yo ni, nyini yiri, am kenkenne n bo am awura i n la kperε. Ama, nzen am yo má kabo noanie kpamaawa n kere ni, i ti ka am awura má kenkenne lεε. ²⁶ Nzen bo ba wura má kenkenne n yo kabo Nyeme noanie kpamaawa n kere ka bu yo ni, Nyeme de bu ka ba wura kenkenne wo lεε. ²⁷ Nyini ti, i sukere ka, bere n bo ba wura má kenkenne na bu yo kabo Nyeme noanie kpamaawa n kere ni, bu dí amberε Yudafoam jore jaraki am, dama am awura kenkenne na am la noanie kpamaawa ni, ama, am yo má kabo i kere ni. ²⁸ Dama má Yudafoam bo ba wura kenkenne anuniembaa su ni ngumi ti Yudafoam nahore su a. ²⁹ Ama, sono bo i ti Yudafo nahore su la bo wo kaaki

wo i ahorembaa su ni, na kenkenne wuraawa nahore su fite ahorembaa su wo, Nyeme Awiewie ni kaaki sono a, ma noanie kpamaawa ni. Nyini sono so, Nyeme kansi i a, ma adamande.

3

¹ To, bo bu ti Yudafoṃ ni, bu la nzu kperε wo? Ye kenkenne wura buka nzu wo? ² Nahore, Yudafoṃ tara minem bo bu ti ma Yudafoṃ ni deke dogu nu. Ciciri su, Nyeme du mo faari i noaniam n wuraari bere saa nu a, ka bu nie i su. ³ Ye nzen Nyeme fa wuraari bere saa nu a, ye bu nbem ayo ma yarada, nyini kere ka Nyeme la ma dabuṃ lεε, nzen se? ⁴ Ai, ma so. Haari ni bo sono kere ti korεfoṃ ni, Nyeme yiri ti i nahorefo o, kabo ba kere i Nyeme Jore Kadasi n nu ni, ka,

“Deke bo a kan ni, bu nu ka nyini ti nahore a,
na nzen bu di u jore jarakiiri u, a kuma bu.”

⁵⁻⁶ Ye nzen ya satiem n bo ya yo bu n kere kabo Nyeme yo sa bo i ko atin su, na i cin ya sui, ya koro se ka wo yo ma sakpa, nzen se? Ai, ma so. Adamande sunsunni lεε. Nzen Nyeme yo ma sa bo i ko atin su, i yo se koro di durunya n nufom jore a? ⁷ Be koro se ka nzen m bu korε, na i ma minem nu kabo Nyeme nahore ti barasu, adena bu ma i jirima, ye nzu ti ye i di m jore cin m sui ka m ti satieyofo a? ⁸ I ti kabo mine nbem nati kan wo, bu na, am ma ya yo satie adena Nyeme ba ma i kaaki sakpa. Bu kpie m nzuko ka mini mmoo se so o. Bu bu korε wo. Nyeme di bu jore na i cin bu sui.

Be wo má bere bo i yo sa bo i kɔ atin su sanja kere

⁹ Tɔ, ya se se wɔ? Yere bo ya ti Yudafoɔm ni, ya tara bo bu ti má Yudafoɔm n nzu nu wɔ? Ai, ya tara má bu pui, dama ma du mɔ ase am ka yere Yudafoɔm ni, ni bo bu ti má Yudafoɔm n kere ti satieyofom wɔ. ¹⁰ Kabo ba kere i Nyeme Jɔre Kadasi n nu ni, ka,

“Be wo má bere bo i yo sa bo i kɔ atin su, haari sɔnɔ kun n kpein mmɔɔ.

¹¹ Be wo má bere bo i la ngɔnlɛ,
be wo má bere bo i nienie Nyeme busu.

¹² Sɔnɔ kere akaaki bu sin abo Nyeme dɛɛ atin ni, bu kere aka ngbeen,

be wo má bere bo i yo sakpa,
haari sɔnɔ kun n kpein mmɔɔ wo má bere.”

¹³ Ba kaaki akere ka,

“Bu konvi ti ka fanɔkunma bo ba teke i su wɔ,
na bu fa bu taferema sudadaka minem.”

“Na jɔre bo i fite bu nɔɔ nu yo ya ka pumpuni bɔre wɔ.”

¹⁴ “Nzukɔlɛɛ ni jɔre tie ngumi fite bu nɔɔ nu a.”

¹⁵ “Bu cɛ má na bu yi mine ngɔɔ ndende.

¹⁶ Deke kere bu kɔ, bu dɛɛ la ka bu yo minem ngbeenngbeen,
na bu saaki bu.

¹⁷ Bu dɛɛ la ka bu nati sukpini jɔre, bu koro má tanalaifie.”

¹⁸ “Bu nyunu yi má Nyeme, nyini dɛɛ ti, bu soro má i.”

¹⁹ Ya si ka deke n kere bo ba kere i Nyeme nɔanie kpamaawa n nu ni, i jɔɔ ni Yudafoɔm bo

bu su i su n wɔ, adena má be koro teke i nɔɔ kan jɔrɛ be, ama, durunya n nufom kere bá jina Nyeme nyunu na i dí bu jɔrɛ na i cín bu sui. ²⁰ Dama be wo má bere bo i koro se ka i su nɔaniɛ kpamaawa n su dɛɛ ti, ye Nyeme de i ka i yo sa bo i kɔ atin su i dɔ a, ama, nɔaniɛ kpamaawa ni ma minem si ka bu ti satieyofom a.

Kabo Nyeme ɲa sɔnɔ yo sa bo i kɔ atin su i dɔ ni

²¹ Ama, kisa Nyeme ayi akere ya kabo ya yo sa bo i kɔ atin su i dɔ, má yiri la bo ya su nɔaniɛ kpamaawa n su ni, ama, yiri la bo nɔaniɛ kpamaawa n ni Nyeme nɔaniɛ kanfom diiri i ɲusu daani ka i yó n wɔ. ²² Yiri la ka, sɔnɔ kere bo wɔ yo Yesu Kristo yarada, yiri ye Nyeme ɲa i yo sa bo i kɔ atin su i dɔ a, nyini ti, ya la má kpakpaakinu, ²³ dama sɔnɔ kere ayo satie afun Nyeme jirima woowa ni, ²⁴ ama, Yesu Kristo ade sɔnɔ kere tii aji, nyini dɛɛ ti ye Nyeme ɲa sɔnɔ kere ayo sa bo i kɔ atin su i dɔ n a, i ti Nyeme aceeri wɔ. ²⁵⁻²⁶ Yiri Yesu ye Nyeme ma i deerɛ adamande jinaabiri n a, na wɔ fa i ɲu ayo yoowa na wɔ wu, adena nzen minem yoori i yarada, i mbunja n dɛɛ ti, Nyeme fá bu satie ce bu. Deke bo i ti na Nyeme yoori sɔ n la ka, i koro ka i kere kabo yiri ni i tii yo sa bo i kɔ atin su n wɔ, dama dawa sangá Nyeme yo laari sawore fa kɔ minem bo bu yo satie n dɔ. Ama, kisa wɔ kere ka yiri ni i tii yo sa bo i kɔ atin su wɔ, na sɔnɔ kere bo i yoori Yesu yarada, Nyeme de i mi ka yiri yo sa bo i kɔ atin su i dɔ a.

²⁷ Nyini dɛɛ ti, nzu deke ye ya koro fa fɔ a? Deke be wo má bere. Nɔaniɛ kpamaawa ni ma

minem yo sa bo i ko atin su Nyeme do a, nzen se? Ai, ma so. Ama, bo minem yo Yesu yarada n de ti a. ²⁸ Ya nie ka deke bo i kere ka Nyeme de sono ka i yo sa bo i ko atin su i do n la kabo wo yo Yesu yarada n wo, ma ka i su noanie kpamaawa n su n de ti a. ²⁹ I ti nahore wo, ka Nyeme ti ma Yudafo m ngumi Nyeme, i ti bo bu ti ma Yudafo m n gusu Nyeme wo. ³⁰ Nyeme ti kun wo. Yarada n de ti, ye Nyeme na Yudafo m bo ba wura kenkenne n yo sa bo i ko atin su i do a, ye minem bo bu ti ma Yudafo m na bu wura ma kenkenne ni, bu yarada ma Nyeme de bu ka bu yo sa bo i ko atin su i do a. ³¹ Nyini sukere ma ka ya yo Yesu yarada n de ti, ya fa ma noanie kpamaawa n yo ma juma a. I ti ma so, ama, nyini ma ya bita noanie kpamaawa n kenken a.

4

Kabo Abraham yoori Nyeme yarada barasu ni

¹ To, am ma ya nie ya na Abraham jore. Ya busu nu, yiri ti ya kere na a. ² Nzen ma i sakpa yoowa de ti ye Nyeme ade i ka i yo sa bo i ko atin su i do, ma i koro fa fo yanfoya, ama, Nyeme do, i ti ma so. ³ Dama ba kere i Nyeme Jore Kadasi n nu ka, "Abraham yoori Nyeme yarada, nyini de ti ye Nyeme ade i ka i yo sa bo i ko atin su i do n a." ⁴ Nzen sono yo juma na ba to i kaari, i ti ma ka bu na ba ce i aceeri wo, i ti i juma ni nkato o. ⁵ Ama, sono bo i yoori yarada, ma ka i sakpa bo wo yo i n de ti ye Nyeme ade i ka i yo sa bo i ko atin su i do n a, ama, wo yo yarada ka Nyeme de satieyofa ka i yo sa bo i ko atin su i do n de

ti a. ⁶ Feme Davidi mmoo yo kaanri nyini minem nusu jore, ka i mi la terefie, dama Nyeme ade i ka i yo sa bo i ko atin su i do, ma ka i sakpa n dee ti a. I na,

⁷ "Terefie wo bu do, minem bo Nyeme fa bu ngasi ce bu ni.

Terefie wo bu do, minem bo Nyeme kata bu satie su ni.

⁸ Terefiefo la sono bo Micera n na i la ma satie be ni."

⁹ To, minem bo bu wuraari kenkenne n ngumi la nyini terefie ni, nzen se a? Ai, minem bo bu wura ma kenkenne ni mmoo la i. Dama ya du mo ase ka, Abraham yarada n dee ti ye Nyeme ade i ka i yo sa bo i ko atin su i do n a. ¹⁰ Sanja bono ye Nyeme seeri so n a? Nyini sanja Abraham awura kenkenne, nzen wo nya wura ma? Ai, nyini sanja wo nya wura ma. ¹¹ Nyini sanja n sin, ye i ba wuraari kenkenne n a. Na i kenkenne wuraawa n kere ka i yarada n dee ti ye Nyeme deer i ka i yo sa bo i ko atin su i do, sanja bo i nya wura ma kenkenne ni. I yoori so ni, adena yiri Abraham ba yo minem bo ba yo yarada n kere si, haari ni bo ba wura ma kenkenne ni, ye Nyeme ade bu ka bu yo sa bo i ko atin su i do n a. ¹² Yiri gusu kaaki ti minem bo ba wura kenkenne n si a, ma ka ba wura kenkenne n dee ti, ama, bo ba yo yarada kabo i yoori yarada sanja bo i nya wura ma kenkenne ni.

¹³ Nyeme yo seeri Abraham ni i busu nufom ka i fa durunya n kere ce bu ni, ma ka i su Nyeme noanie kpamaawa n su dee ti a, ama, kabo wo yo Nyeme yarada n ti ye Nyeme deer i ka i yo sa bo i

ko atin n su i do a. ¹⁴ Nzen mine su Nyeme noanie kpamaawa n su ye bu nya deke n bo Nyeme seeri ka i ce bu ni, nyini la ka yaradayo n ti ngbeen wo lee, na kabo Nyeme ase n gusu la ma kpere. ¹⁵ Nzen minem saaki noanie kpamaawa ni, nyini ma Nyeme fa yaa na i cin bu sui a, ama, nzen ma noanie kpamaawa be wo ma bere, ma deke be wo ma bere bo i kere ka sono ayo satie.

¹⁶ Nyini ti, deke bo Nyeme yo seeri ka i fa ma ni, i baari minem bo bu yo yarada n dee ti wo. I yoori so ni, adena deke n bo i yo seeri ka i yo n yo aceeri kpama ma Abraham busu nufom kere, ma bo bu su noanie n kpamaawa n su ngumi, ama, bo ba yo yarada kabo Abraham yoori ni. Yiri ti ya kere si a, ¹⁷ kabo ba kere i Nyeme Jore Kadasi n nu ni, ka, Nyeme na o, "M ma a yo mine barasu dongu si." Nyeme nuuri ka Abraham ayo yarada ka yiri Nyeme tenge minem bo ba wu n yiwee nu, na yiri ma deke n bo i yo wo ma bere n wo bere a. ¹⁸ Nyini ti, sangha bo Abraham yoori yarada na i la tama ni, i ti kekereke na i yo tama ka i ba yo mine barasu dongu si, kabo ba kere i Nyeme Jore Kadasi n nu ka, "U busu nufom ba sunnu beberebe ni." ¹⁹ Haari ni sangha bo wo ju afo yaa, na i si ka wo yo kpien ni, na i yi Saara ti noroka na wo yo buke n kere ni, i nunie ayorki ma i, i yoori yarada a. ²⁰ Wo yo ma sika fa ko deke bo Nyeme seeri ka i yo i n su, ama, yarada n bo i yoori i n dee ti, na wo nya fanga na wo kansi Nyeme. ²¹ Na wo si tenle su ka Nyeme koro yo deke n bo i yo seeri ka i yo i ni. ²² Abraham yoori yarada a, nyini dee ti ye Nyeme ade i ka i

yo sa bo i ko atin su i do n a. ²³ Kabo ba kere i ka, Nyeme ade i ka i yo sa bo i ko atin su i do ni, ma Abraham ngumi dee ti ye bu kereeri i so a, ²⁴ ama, yere gusu dee ti ye bu kereeri so n a, yere bo Nyeme ba de ya ka ya yo sa bo i ko atin su i do n na ya yo i yarada ni, yiri bo i tengeeri ya Mibie Yesu i yiwee n nu ni. ²⁵ Ya satie dee ti ye Yesu wuuri a, na wo tenge i yiwee n nu, adena Nyeme de ya ka ya yo sa bo i ko atin su i do.

5

Kabo Nyeme ade ya ka ya yo sa bo i ko atin su ni

¹ To, ya yo yarada, na Nyeme ade ya ka ya yo sa bo i ko atin su i do ni, ye ya ni yiri afien ayo dongu a, ya Mibie Yesu Kristo dee ti. ² Yesu Kristo dee ti ma ya la atin jina deke bo ya wo kisa n a, yiri la Nyeme ahorama n bo wo fa ama ya ni, na ya la ahorejo, dama ya la tama ka ya nya Nyeme dee jirima woowa n be. ³ Na nzen ya gusu la ahorejo sanja bo ya di wahara, ya si ka wahara di ni ma ya mindi a. ⁴ Nzen ya la mindi, nyini ma ya la wo kpa a, nzen ya la wo kpa, nyini ma ya la tama a. ⁵ Na tama n bo ya la i ni, i ma ya di ma nyinse, dama Nyeme afa i Awiewie Casi n ama ya, yiri ma ya si ya ahore su kabo Nyeme koro ya agaya barasu a.

⁶ Sanja bo ya la ma fanga mmoo ni, nyini sanja n ye Kristo ba wu maari satieyofom n a. ⁷ I ti kekereke ka sono soro su na i to i ngoo na i wu ma sono bo i yo sa bo i ko atin su, ama, beni, be koro fa ahoresi na i soro su na i de sono bo

i yo sakpa agaya jinaabiri na i wu ma i. ⁸ Ama, Nyeme yiri akere ya kabo i koro ya barasu, dama sanja bo ya toko yo satiem ni, ye Kristo ba wu maari ya a. ⁹ Nyini dee ti, i yiwee n bo i wu maari ya ni, ye Nyeme ade ya ka ya yo sa bo i ko atin su i do n a, nyini ti, i ti nahore wo ka i de ya fite suicin n bo Nyeme fa cin satieyofom ni. ¹⁰ Sanja bo ya yo ti Nyeme kpofom ni, ye i wa Yesu wu maari ya n a, na wo yo ya ni Nyeme afien dongu, kisa na ya ni Nyeme afien ayo dongu ni, i de ya tii ji nahore su, dama Yesu la ngoo n dee ti. ¹¹ Ma nyini ngumi a, ama, ya la ahorejo na ya bo tuntun Nyeme ya Mibie Yesu Kristo dee ti, dama wo yo ya ni Nyeme afien dongu.

Adam ni Yesu Kristo jore

¹² Am ma ya tenge ya kere na Adam jore su. Yiri sono kun dee sa bo i yoori i ni faari satie baari durunya n nu a, ye satie n gusu faari yiwee ba kuunri sono kere n a, dama sono kere yo satie wo. ¹³ Satie yo woori durunya n nu ka, ye Nyeme nya ba faari i noanie kpamaawa n maari a, ama, sanja bo Nyeme nya fa ma i noanie kpamaawa n ma ma ni, minem yo kan ma satie jore, dama noanie kpamaawa be wo ma bere n dee ti. ¹⁴ Ama, haari nyini mmoo, fite Adam sanja n kere ko ju Moyisi sanja ni, yiwee la yiko kun minem so o, haari ni bo ba yo ma satie kabo Adam yoori ni. Adam woowa kere ya deke be fa ko yiri n bo i ba ba n jore a.

¹⁵ Ama, aceeri n bo Nyeme afa ama ya ni, i ti ma ka Adam dee satie ni. Sono kun satie dee ti ye mine dongu wuuri a, ama, deke bo i tara i kere

n la ka, mine dongu anya ahoroma bambaka, i ti aceeri bo i fite Nyeme do o, sono kun ahoroma dee ti. Yiri la Yesu Kristo. ¹⁶ Bekun, Nyeme aceeri n ti ma ka sono kun n dee satie ni, dama sono kun n dee satie ni, nyini ma Nyeme di mine jore cin bu sui a, ama, mine dongu satie bo ba yo i n dee sin, ye Nyeme ace bu aceeri a, na wo de bu ka bu yo sa bo i ko atin su i do. ¹⁷ Ya ngu ka sono kun dee satie ti, ye yiwee la yiko kun mine so n a, yiri sono kun n satie dee ti. Ama, deke bo i tara i kere n la kabo mine anya ngoo adi femeya n wo, dama ba nya ahoroma bambaka n bo i ti Nyeme aceeri ni, Nyeme ade bu ka bu yo sa bo i ko atin su i do a. I kere fite sono kun n dee ti wo, yiri la Yesu Kristo.

¹⁸ Nyini ti, kabo sono kun dee satie ti na Nyeme di minem kere jore cin bu sui ni, so bekun ye sono kun dee sakpayo ni ma Nyeme de minem kere ka bu yo sa bo i ko atin su i do na bu nya ngoo a. ¹⁹ Na kabo sono kun keteeri Nyeme noanie n na minem kere ayo satieyofom ni, so bekun ye sono kun gusu ade Nyeme noanie n a, nyini ye Nyeme de minem kere ka bu yo sa bo i ko atin su i do a. ²⁰ Nyeme faari i noanie kpamaawa n kereeri a, na mine si kabo satieyo asunnu barasu a, ama, deke bo satieyo sunnu, Nyeme ahoroma n bo wo fa ama n sunnu tara so. ²¹ Nyini ti, kabo satie la yiko na i ma yiwee kun minem so ni, so ye Nyeme ahoroma n dee ti, ye i de minem ka bu yo sa bo i ko atin su i do a, na bu nya ngoo bo i la ma awieeri a, ya Mibie Yesu Kristo dee ti.

6

Yesu Kristo dɛɛ ti ya la ɲɔɔ

¹ Tɔ, ye ya se sɛ wɔ? Ya koro kɔ su suyo satie, adena Nyeme ahɔrɔma buka su, nzen sɛ? ² Ai. I koro yo má sɔ. I ti ka ya ti minem bo ba du mɔ awu wɔ, fa kɔ satie su. Ye nzu ti ye ya toko yo satie bekun a? ³ Am si má Nyeme nzue n bie n bu wɔ? Yere bo bu biɛri ya Nyeme nzue ni, ya ni Yesu Kristo ayo kun lɛɛ, na ya ni yiri asanga awu yiwee kun lɛɛ. ⁴ Sanga bo bu biɛri ya Nyeme nzue ni, i ti ka ya ni Yesu asanga awu, na ba kaaki ase ya ni yiri wɔ lɛɛ. Na kabo ya Si Nyeme Yikofɔ n tengeeri Yesu i yiwee nu ni, sɔ ye i má ya gusu nya nyini ɲɔɔ fɔfɔre n a.

⁵ Ya ti kabo i ti n wɔ, sanga bo i wuuri ni, sɔ ye wɔ yo daka ka ya bá ti kabo i ti n a, i yiwee tenge n nu. ⁶ Ya si ka, ya woowa dawa ni, ba sanga akpama i ni Kristo i baka jaanu n su, adena má ya yo akɔm fa kɔ satie su kun, dama anuniembaa n bo i yo satie n wo má bere kun. ⁷ Dama sɔnɔ kere bo wɔ wu, wɔ de i tii afite satie nu lɛɛ. ⁸ Tɔ, kabo ya ni Kristo sanga wuuri ni, sɔ ye ya yo yarada ka ya ni yiri sanga nya ɲɔɔ a. ⁹ Ya si ka Kristo tengeeri i yiwee n nu ni, i wú má kun, dama yiwee la má i ɲusu yiko kun. ¹⁰ Yiwee n bo i wuuri ni, i wuuri kpekun n kpein wɔ, na i yi satie, ama, ɲɔɔ n bo i la i ni, i wo Nyeme dɛɛ wo wɔ. ¹¹ Sɔ ye i ti ye ni ka amɛre ni am tii si ka am awu fa kɔ satie su a, na am ni Yesu ayo kun, ye am la ɲɔɔ wo Nyeme dɛɛ wo a.

¹² Nyini ti, má am ma satie la yiko fa kɔ am ɲuniembaa n su, na am yo am kunnu koroowa.

¹³ Má am fa am ηuniembaa be ma satie, na i kaaki deke bo i yo satie, ama, am fa am ηu ma Nyeme ka minem bo ba tenge yiwee nu anya ηgոո kisa, na am fa am ηuniembaa n kere ma Nyeme na i fa am yo deke bo i yo sa bo i kո atin su. ¹⁴ Satie la má yiko fa kո am dո, dama Nyeme ոանie kpamaawa n nie má am su kun, ama, Nyeme ahորոma ni nie am su a.

Minem bo ba kaaki sa bo i kո atin su akոոm

¹⁵ Tո, nzu bekun a? Kisa, Nyeme ոանie kpamaawa n nie má ya su kun, ama, Nyeme ahորոma ni nie ya su a. Nyini ti, ya koro yo satie, nzen se? Ai, má sո. ¹⁶ Am si ka nzen am faari am ηu maari be na am deeri i mi ոանie, am ti i mi n akոո յ լեε. Kabo i nya ti sո ni, nzen am faari am ηu maari satie, am ti satie akոո յ, na am wú յ լեε. Ama, nzen am gusu deeri Nyeme ոանie ni, i dé am ka am ayo sa bo i kո atin su i dո յ լեε. ¹⁷ Sanğa be am yo ti satie akոոm wո, ama, kisa ya da Nyeme asi ka Nyeme ոանie n bo bu fa kereeri am, na am ade i ni am ahorembaa kere ni, ¹⁸ am ade am tii afite satie nu լեε, am akaaki sa bo i kո atin su n akոոm wո. ¹⁹ M fa adamande dեե woowa, ye m fa kere kabo Nyeme ti a, dama am suti má i bu. Am yo fa am ηuniembaa n be yoori dangba sam wո, ni satie barasum wո, nyini ma am saaki ոանie kpamaawa n a, sո ye kisa am fa am ηuniembaam yo sa bo i kո atin su, nyini ma am yo Nyeme mine casim a.

²⁰ Sanğa bo am yo ti satie akոոm ni, be mie má am ka am yo sa bo i kո atin su. ²¹ Satiem bo am yo yoori bu ni, nzu kperե ye am nyaari i a? Pui. Kisa, bu ti am nyinse wո, na i awieeri kere

la yiwee wɔ. ²² Ama, kisa na am ade am tii afite satie nu, na am ayo Nyeme akoom ni, kperɛ bo am anya i ni, yiri la bo am ayo i mine casim ni, na i awieeri, am nyá ngɔɔ bo i la má awieeri ni. ²³ Dama satie nkato la yiwee wɔ, ama, Nyeme aceeri n bo wɔ fa ama ya n la ngɔɔ bo i la má awieeri na i wo ya Mibie Yesu Kristo nu n wɔ.

7

Ajaa woowa kere kabo atin fɔfɔre n ti barasu
a

¹ Tɔ, m ninbaam, m sujɔɔ ambere bo am si noanie kpamaawa ni do a. Am si má ka nzen sɔnɔ toko la ngɔɔ, ye noanie kpamaawa n nie i su a? Ama, i nya wu wieeri, i koro nie má i su kun. ² Ya fa i ka, nzen bara aja, na i hun toko la ngɔɔ, noanie kpamaawa n ma má atin ka i yaki i ajaa, ama, nzen i hun n nya wuuri, i la atin bo i koro kɔ ja biesɔ fɔfɔre. ³ Nyini ti, nzen i hun n toko la ngɔɔ na i kɔ jaari biesɔ fɔfɔre, bu fére i ka bara bo wɔ saaki ajaa ciire wɔ, ama, nzen i hun n awu ye i kɔ jaari biesɔ fɔfɔre, noanie kpamaawa n ma i atin wɔ, wɔ saaki má ajaa ciire lee. ⁴ Tɔ, nyini ti, m ninbaam, i ti sɔ o lee, ambere mmɔɔ do. Kabo am ni Kristo ayo kun na wɔ wu ni, bu sangá kuunri am ni yiri wɔ lee. Nyini ti, noanie kpamaawa n nie má am su kun, nyini ma am la atin na am kaaki be deem n a. Nyini la ka, am ti Kristo deem wɔ lee, yiri bo i tengeeri i yiwee n nu ni. Deke n bo i ti na i yo sɔ n la ka, ya koro yo sakpa ma Nyeme. ⁵ Sangá bo ya yo su ya adamandé woowa su ni, ya koroowa la ka, ya sufa ya nuniembaam suyo satiem, noanie

kpamaawa n dɛɛ ti. Nyini satiem n awieeri la yiwee wɔ. ⁶ Ama, kisa, ya nya ya tii afite nɔanie kpamaawa n bo i yo nie ya su ni, dama ya wu wɔ. Nyini ti, ya su Nyeme wɔ, ya su má atin dawa n bo i su nɔanie kpamaawa n bo ba kere ase n su, ama, ya su Nyeme ni atin fɔfɔre n bo Awiewie Casi n afa ama ya ni su a.

Kabo nɔanie kpamaawa n ma mine yo satie barasu ni

⁷ Tɔ, ye ya se se wɔ? Ya koro se ka nɔanie kpamaawa n ti satie, nzen se? Ai, má sɔ. Nzen má nɔanie kpamaawa n awo má bere, má m si má kabo satie ti. Dama nzen má nɔanie kpamaawa n ase má ka, “Má a ma u konviki wura be dɛɛ nenje nu,” má m si má ka nzen u konviki wuraari be dɛɛ nenje nu, i ti satie wɔ. ⁸ Nɔanie maawa n bo i seeri sɔ n dɛɛ ti, satie anya atin m ahore su, nyini ma m la konviki barasu barasu fa kɔ minem nenje nu n a. Nyini kere ka nzen nɔanie kpamaawa n wo má bere, satie la má yiko, i ti ka deke bo wɔ wu wɔ. ⁹ Sangga be m yo la ngɔɔ ɔ, na m si má nɔanie kpamaawa n jɔre, ama, sangga bo nɔanie maawa n baari ni, na wɔ ye satie su m ahore su, ¹⁰ na ma wu. Na ma ŋu ka nɔanie maawa n bo má i ma ngɔɔ ni, mini dɔ, i faari yiwee baari a. ¹¹ Nɔanie maawa n dɛɛ ti, ye satie anya atin awura m ahore su adadaka m, ye i kun m a. ¹² Nyini kere kere ka nɔanie kpamaawa n ni i tii, ti deke kpa fite Nyeme dɔ ɔ, na nɔanie maawa kun kun n kere ti deke kpa a, na i kere sa bo i kɔ atin su.

¹³ Nyini ti, noanie kpamaawa n bo i ti kpa ni, wo ma ma wu wo, nzen se? Ai, ma so. Ama, satie fa nyini noanie kpa n su wo, ye i ma m wu a, adena satie kere kabo i ti barasu nahore su, na noanie maawa n ma minem si kabo satie ti deke tie agaya ni.

Woowa barasu nnyo bo i wo adamande nu ni

¹⁴ Ya si ka noanie kpamaawa n ti awiewie jore wo, ama, mini yiri, m bita adamande dee woowa a, na m ti satie akoo. ¹⁵ Sam bo m yo bu ni, m koro si ma deke n bo i ti na m yo bu ni, dama deke n bo m koro ka m yo bu ni, m yo ma nyini, ama, deke n bo m kpo bu ni, m yo nyini wo. ¹⁶ Nyini ti, nzen m yoori satie be, na m koro ma i, ma soro su ka noanie kpamaawa n ti kpa wo lee. ¹⁷ Ma nu ka ma m koroyanu ye m yo nyini satiem n a, ama, satie n bo i wo m ahore su ni ma m yo so a. ¹⁸ M si ka woowa n bo m bita i ni, i ti ma kpa haari kaan so, i ti adamande woowa a, nyini ti, sakpayo wo m ahore su, ama, m koro yo ma i. ¹⁹ M koro ka m yo sakpa, ama, m koro yo ma i, satie n bo m koro ma ka m yo i ni, m yo nyini wo. ²⁰ Satie n bo m yo bu na m koro ma ka m yo bu ni, nyini la ka, ma mini ni m tii yo bu a, ama, satie n bo i wo m ahore su ni yo bu a.

²¹ Ma nu ka nyini jore n ti nahore wo, ka, sangga kere bo m koro ka m yo sakpa, nyini sangga ye m yo satie a. ²² Dama m sunsunni ni m ahore su, m koro Nyeme noanie kpamaawa ni. ²³ Ama, ma nu ka noanie barasu be wo m nuniembaa n kere nu, nyini noanie tie n kun lue ni noanie kpamaawa

n bo i wo m sunsunni ni m ahore su n wɔ, na i kunma m ηuniɛmbaa n kere nu, na i tara m nyi m. ²⁴ Oi. Mini anunfofo so. Nma de m tii ji a, na i yi m fite ahin adamande anuniɛmbaa n nu a, bo i sucin m ko yiwee n nu, na m ka ηgbɛɛn n a? ²⁵ M da Nyeme asi, dama wɔ de m tii aji, ya Mibie Yesu Kristo deɛ ti.

To, mini do, m sunsunni ni m ahore su, m su Nyeme noɛnie kpamaawa n su wɔ, ama, m adamande deɛ woowa su, m su satie atin su wɔ.

8

Minem bo bu woowa ti kabo Awiewie Casi n koro ni

¹ Nyini ti, kisa, sono kere bo i ni Yesu Kristo ayo kun, Nyeme di ma i jore cin ma i sui. ² Dama Awiewie Casi n deɛ noɛnie kpamaawa n bo i ma ya ηgo, na i fite Yesu Kristo do ni, ade u tii aji, na wɔ yi u afite noɛnie kpamaawa n bo i ma a yo satie na a wu n nu ni. ³ Nyini noɛnie kpamaawa n la ma fanga, dama adamande anuniɛmbaa woowa n ayɔrɔki. Deke bo noɛnie kpamaawa n akoro ayo ma i ni, Nyeme ayo i, yiri la bo i sunmaari i tienɔgu Wa durunya n nu fen, ni anuniɛmbaa bo i ferema ni adamande deɛ n bo i yo satie ni, na wɔ di satie bo i wo adamande ηunie n nu n jore, na wɔ yo i ηgbɛɛn. ⁴ Deke bo i ti na Nyeme yoori so n la ka, adena ya yo sa bo i ko atin su kabo noɛnie kpamaawa n kereeri ni, dama yere, ya su ma adamande anuniɛmbaa woowa n atin su kun, ama, ya su awiewie n deɛ atin ni su a. ⁵ Minem kere bo bu su adamande anuniɛmbaa woowa n atin su

ni, bu sunsunni kere wo adamande sa koroowa su wɔ, ama, minem bo bu su Awiewie Casi n deɛ atin n su ni, bu sunsunni kere wo Awiewie Casi n jɔre su wɔ. ⁶ Bo i sunsunni wo adamande aɲuniembaa woowa n su, i mi wú ɔ, ama, bo i sunsunni wo Awiewie Casi n jɔre su, i mi nyá ηɔɔ, na i nyá ahoreda. ⁷ Dama sɔnɔ kere bo i sunsunni kere wo adamande aɲuniembaa woowa n su ni, i mi ti Nyeme kpɔfɔ ɔ, i de má Nyeme nɔanie kpamaawa ni, i koro de má i wɔ mmɔɔ fieo, ⁸ na bo i su adamande deɛ aɲuniembaa woowa n su ni, i koro yo má sa bo i sun Nyeme nu.

⁹ Ama, amberɛ yiri, am su má adamande aɲuniembaa woowa n atin n su, am su Awiewie Casi n deɛ atin ni su a, dama Awiewie Casi n wo am nu n wɔ. Ama, sɔnɔ kere bo i la má Kristo Awiewie ni, i mi ti má Kristo deɛ. ¹⁰ Ama, amberɛ bo Kristo wo am dɔ ni, am ηuniembaa n bá wu wɔ, satie deɛ ti, ama, Awiewie Casi ni ama am ηɔɔ, dama Nyeme dɔ, i de am ka am yo sa bo i kɔ atin su wɔ. ¹¹ Nahɔre su, Nyeme tengeeri Yesu i yiwee n nu, nyini ti, nzen i Awiewie Casi n wo am nu, haari am ηuniembaa wuuri mmɔɔ, i tɛnge i kabo i tengeeri Yesu i yiwee n nu n wɔ, dama i Awiewie n wo am nu n deɛ ti.

¹² Nyini deɛ ti, m ninbaam, ya di kaari, má yere adamande aɲuniembaa woowa n su deɛ kaari, bo má ya fa su yere adamande aɲuniembaa woowa n atin su ni. ¹³ Dama nzen am su adamande deɛ aɲuniembaa woowa n atin su, am wú wɔ lee, ama, nzen am ma Awiewie Casi n bukaari am, na am yakiiri adamande aɲuniembaa woowa ni, am nyá ηɔɔ. ¹⁴ Minem kere bo bu ma Nyeme

Awiewie n kere bu atin, bere ti Nyeme nbaam a. ¹⁵ Dama Awiewie Casi n bo am ade i ni, i yaki má am na am kaaki yo akoom kun na am soro sere, ama, yiri ma am yo Nyeme nbaam a, na yiri ma am koro bo fere Nyeme ka, “*Abba*,” i bu la ka, “*M Si.*” ¹⁶ Awiewie Casi n ni i tii buka ya dee awiewie n ye i di daani ya ahore su se ka ya ti Nyeme nbaam a. ¹⁷ Kabo ya ti Nyeme nbaam ni, ya nya deke n bo Nyeme ase ka i fa ma i minem ni, na ya ni Yesu Kristo gusu sangga nya deke n bo Nyeme ase ka i fa ma i minem n a. Nzen ya ni yiri sangga diiri wahara, ya ni yiri gusu sangga nya i jirima woowa ni.

Kabo ya woowa ba ti kabo Nyeme dee n ti ni

¹⁸ M sunsun ka wahara n bo ya sudi i kisa ni, i ti ma pui, ya koro fa ma i sunsun ma jirima woowa n bo Nyeme ba yi i kere ya ni. ¹⁹ Deke n kere bo Nyeme ayi bu n nminda ni anyumboro wo, na bu ba nu kabo Nyeme yi i nbaam fite fofoe n nu. ²⁰ Dama deke n kere bo Nyeme ayi bu n wo bere wo, bu la ma kpere, ma ka bere koro so a, ama, Nyeme ma bu la ma kpere a. Deke bo i ti na i yo so n la ka, i la tama ²¹ ka deke n kere bo wo yi bu ni, bu nya bu tii, na ma bu yo akoom kun, na bu wu na bu kporo, ama, na bu nya tiide ni jirima woowa kabo Nyeme nbaam kere nya i barasu ni. ²² Ya si ka deke n kere bo Nyeme ayi bu ni, wo waraki ni yaari nu wo, haari ni kisa, kabo bara ba suwu baa na i di yaari ni. ²³ Ma deke n bo Nyeme ayi bu ni ngumi wo waraki su a, ama, yere mmoo bo ya de i Awiewie bo i ti ciciri su aceeri ni, ya wo waraki su sunminda ni

anyumboro wɔ, ka Nyeme bá fa ya yo i nbaam, na i de ya nɔnie ni. ²⁴ Tiide n bo ya nya i ni, nyini ma ya la tama n a. Nzen a la deke, a se má ka a la tama ka a nya i. Deke bo sɔɔ la i, i se má ka i la i tama. ²⁵ Ama, nzen ya la tama ka ya nyá deke be na ya nya nya má i, ya mindi n̄minda ni anyumboro wɔ, na ya bá nya i.

²⁶ I ti sɔ lɛɛ, saŋga kere bo ya yɔrɔki na ya si má kabo ya yo ni, Awiewie Casi n ba buka ya, beni, ya si má kabo ya sere Nyeme barasu, ama, Awiewie Casi n ni i tii waraki sɔ sɔ sere Nyeme ma ya, ni waraki bo adamande koro jɔjɔ má i. ²⁷ Nyeme fiiti adamande ahorembaa su na i si kabo i ti barasu a, yiri si deke bo i wo i Awiewie Casi n sunsunni nu a, dama Awiewie Casi n su kabo Nyeme koro ni su a, na i sere Nyeme ma i minem. ²⁸ Ya si ka Nyeme wo minem bo bu koro i n dɔ, na i buka bu, adena i yo deke kere dɔnggu ma bu, bere la minem bo i du mɔ seseeri su ka i fere bu ni, na wɔ fere bu. ²⁹ Nyeme du mɔ siiri nyini minem wɔ, na wɔ cici ka bu bá yo kabo i Wa n ti ni, nyini ma i Wa n yoori baakpien, i nbaam kere nu n a. ³⁰ Nyeme du mɔ ciciiri nyini n kere wɔ ka, na wɔ nya fere bu, na bere n bo wɔ fere bu n ye wɔ de bu ka bu yo sa bo i kɔ atin su i dɔ n a, na bere n bo wɔ de bu ka bu yo sa bo i kɔ atin su i dɔ ni, ye wɔ ma bu i jirima woowa n be n a.

Kabo Nyeme akere i koro barasu ni

³¹ Tɔ, kisa, ye ya se sɛ wɔ bekun a, fa kɔ ahin sam kere su a? Nzen Nyeme wo ya dɔ, n̄ma koro yo ya sa be a? ³² Nyeme akete má ka i

fa má i tienḡu Wa ni mmɔɔ ma má ya, ama, i faari i maari ya kere wɔ. Nyini ti, i yo se kete ka i má má ya deke n kere bo i ti kpa na?

³³ Nma koro fa jɔre fa sɔ Nyeme minem bo wɔ yi bu na? Be wo má bere, dama Nyeme ni i tii ade bu ka bu yo sa bo i kɔ atin su i dɔ a.

³⁴ Nyini ti, nma koro di ya jɔre cin ya sui a? Be wo má bere. Dama Kristo ni i tii wuuri wɔ, nahore na wɔ tenge i yiwee n nu, i tana Nyeme saa fombɔɔ su, susere i ma ya. ³⁵ Koro n bo Kristo koro ya ni, nzu deke koro kpaaki ya ni yiri a? Ai. Deke be koro kpaaki má ya ni yiri n nu. Kekereke o, wahara o, wuwuruwa o, ahɔe o, yaari o, anyumboro o, yiwee o. Deke be wo má bere bo i koro kpaaki ya ni yiri nu. ³⁶ Dama ba kere i Nyeme Jɔre Kadasi n nu ka,

“Wɔɔ dɛɛ ti, ale kere bo i cin, bu kun ya sɔ ɔ, ya ti ka nbɔem wɔ, ye bu kpie ya kɔm a.”

³⁷ Haari ni nyini n kere mmɔɔ ni, ya di nasara a, na ya toko di nasara buka su, Kristo bo i koro ya n dɛɛ ti. ³⁸⁻³⁹ M si tenle su ka, deke be wo má bere bo i koro kpaaki ya ni koro n bo Nyeme koro ya, ya Mibiɛ Yesu Kristo dɛɛ ti ni, yiwee wara nḡɔɔ o, merkem wara Sitana yikofɔm o, deke n bo bu wo bere o, wara deke n bo bu bá yo o, yiko bo i wo angoro wara asien bu o. Deke n bo Nyeme ayi bu ni, bu be wo má bere bo i koro kpaaki koro n bo i wo ya ni Kristo afien ni.

9

Minem bo Nyeme afere ayi bu n jɔre

¹ Tɔ, deke bo m sukan kere am ni, i ti nahore wɔ, m bu má kɔre, m ti Kristo dɛɛ wɔ,

Awiewie Casi n gusu kere m sunsunni nu a, ye i di daani m ahore su a. ² Yiri la ka, m ahore asaaki agaya, na sangar kere i suyo m yaa ³ fa ko m ninbaa Yisarelifom dee busu. Nzen ma mini ni m tii kaari ngbeen, na m kpaaki yakiiri Kristo, adena i buka m ninbaam, m dee tienngu minem ni, ma m koro. ⁴ Bere la Yisarelifom bo Nyeme maari bu atin ka bu yo i nbaam, na bu nuuri i jirima woowa ni, na i faari sesesum diiri i di ni bere ni, na i faari noanie kpamaawa n maari bu ni, na i kereeri bu kabo bu su i barasu ni, na i seeri ka i yo sakpa beberebe ma bu ni. ⁵ Bu ti ya nam busu nufom wo, haari Kristo Tiidefo n bo Nyeme sunmaari i na i kaaki adamande baari durunya n nu ni, bu wuuri i fite bu dee busu n nu wo. Kristo Tiidefo ni la yiko tara deke n kere, yiri ti Nyeme a, yiri ti ye ni kansi sangar kere a. Ami.

⁶ I ti ma ka Nyeme noanie n ti ma nahore wo, dama ma bu kere bo bu wuuri bu Yisarelifom busu nu ni n ti Yisarelifom nahore su a. ⁷ Nahore, ma nbaam kere bo Abraham wuuri bu ni ti i nbaam nahore su a, ama, Nyeme yo seeri Abraham ka, "U wa Izaki sinfom ngumi yo u busu nufom a." ⁸ Nyini la ka, ma nbaam kere bo Abraham wuuri bu kabo adamande wu nbaam ni ti Nyeme nbaam nahore su a, ama, i nbaam bo Nyeme seeri ka i wu bu ni ngumi, ti i busu nufom nahore su a. ⁹ Dama kabo Nyeme yo seeri i n yaa, i na, "Ti fen, ngoo een ka buuso, m kaaki ba na m ba nu ka u yi Saara bita baabieso." ¹⁰ Ma nyini ngumi a, am tenge su ka ya na Izaki yo maari i yi Rebeka akunnu, ye i wuuri ndaam

n a. ¹¹⁻¹² Sanga bo Rebeke nya wu má i ndaam ni, na bu nya yo má sakpa wara satie be ni, nyini sanga n ye Nyeme seeri i ka, “Baakpien ni bá su baakan n a.” Nyeme de koroyanu ye i yoori so n a, yiri koro i sono ye i yiiri i a, má ka bu be sayoowa de ti a. ¹³ Kabo ba kere i Nyeme Jore Kadasi n nu ni, ka, Nyeme na,
 “Jakobu, ye m koro i a,
 ama, Isawu yiri, m kpo i wo.”

¹⁴ Ye ya se se wo? Ya koro se ka Nyeme ayo má sa bo i ko atin su, nzen se? Ai, ya koro se má so fieo. ¹⁵ Dama Nyeme yo seeri Moyisi ka,
 “Sono kere bo m koro ka m buka i, m buka i wo,
 na sono kere bo m koro ka m si i anunfo, m si i anunfo o.”

¹⁶ Nyini ti, má adamande koroyanu, wara deke bo i boro i nyi yo i ni ti jore a, ama, kabo Nyeme si anunfo ni, nyini ti jore a. ¹⁷ Dama ba kere i Nyeme Jore Kadasi n nu ka, Nyeme yo seeri Ijipiti Feme Faaro ka, “Deke n bo i ti na m yiiri u tanaari femeya bie n su n la ka, m kere m yiko u ngoo su, na m duma tá bara ye durunya n kere nu.”

¹⁸ Nyini kere kere ka, sono kere bo Nyeme koro ka i si i anunfo, ye i si i mi anunfo a, na minem bo i koro ka i yo bu ahorembaa kekereke ni, na i yo bu.

Nyeme yaafa ni i anunfo si n jore

¹⁹ Nyini ti, beni, be koro bisa m ka, “Nzen i ti so, nzu ti ye Nyeme di minem bo ba kete i n jore na i jarki bu a? Nma koro kete na i kanda sa bo Nyeme koro i n a?” ²⁰ M na, woro la nma na a se Nyeme akuruwa a? Dundu koro bisa má yakati

tafo n ka, “Nzu ti ye a taari m so a?” ²¹ Yakati tafo n la atin bo i fa i yakati n ta dundu bo i sufa yo juma ceen n kere ceen, na i kaaki la atin bo i fa be ta dundu bo i fa yo juma ceen kpiri ceen. ²² Nyini ti, Nyeme la atin bo i koro fa yaa, na minem nu kabo i yiko ti barasu. I gusu koro mindi agaya fa ko minem bo bu ma yaa ati i ni, bere bo ma wo yo daka ka bu ka ngbeen ni. ²³ Na i gusu la atin bo i fa i jirima woowa bo i la ma anusu n fa kere minem bo wo si bu anunfo ni, na wo du mo asese su ka bu ba nya i jirima woowa n be ni. ²⁴ Yere la nyini minem bo i si ya anunfo, na ya nya i jirima woowa n be ni, ma ka yere Yudafo ngumi, ye wo fere ya nbem a, ama, wo fere bo bu ti ma Yudafo ni mmoo nbem abuka su. ²⁵ I ti kabo Nyeme noanie kanfo Hoseya akere i dee kadasi n nu n wo ka, Nyeme na,

“Minem bo bu yo ti ma m minem ni, m fere bu ka m minem.

Na yiri n bo ma koro ma i ni, m fere i ka m sono koroowa.

²⁶ Dika n bo i nu na m fereeri bu ka, ‘Am ti ma m minem ni,’

do ye bu fere bu ka Nyeme bo i wo bere sangha kere n dee nbaam n a.”

²⁷ To, na Nyeme noanie kanfo Esaya abo awie fa ko Yisarelifom jore su, i na, “Haari ni bo Yisarelifom sunnu beberebe ka nmie ni, bu nu mine kaan so nya tiide a. ²⁸ Dama sa n bo Micera ni yo i durunya n nu ni, i yo i wie ndende.” ²⁹ I ti kabo Esaya du mo seeri n wo, i na,

“Nzen ma Micera Yikofa n ayaki ma ya busu nufom nbem,

má i yo ya kabo i yoori Sodomfom ni
Gomorafom wɔ,
mie tiem bo Nyeme saaki bu ni.”

Yisarelifom ni labari kpa n jɔɛ

³⁰ Tɔ, ye ya se se wɔ? Minem bo bu ti má Yuda-
fom ni, akpini má atin kabo bu yo sa bo i kɔ atin
su Nyeme dɔ, ama, kisa, Nyeme ade bu ka bu
yo sa bo i kɔ atin su i dɔ, bu yarada n dɛɛ ti.

³¹ Ama, na Yisarelifom bere, akpini atin kabo bu
su nɔaniɛ kpamaawa n su, adena Nyeme de bu
ka bu yo sa bo i kɔ atin su. Ama, haari ni nyini
mmɔɔ, ba koro asu má i su nyunyumi, na bu yo
sa bo i kɔ atin su Nyeme dɔ. ³² Nzu ma i yoori sɔ
n a? Dama ba kpini má atin kabo bu yo yarada
na Nyeme de bu ka bu yo sa bo i kɔ atin su i dɔ,
ama, bu kpiniiri atin ka bu sayoowa ma Nyeme
de bu ka bu yo sa bo i kɔ atin su i dɔ a. Na ba
bo bu jaa yabue n su na ba kpaasi. ³³ Kabo ba du
mɔ akere i ase ni, Nyeme ɲa,

“Am ti fen, m sufa yabue be se Siyon mie kpiri n
nu lee,
nyini yabue ni, minem bó bu jaa su na bu
kpáasi.

Ama, sɔnɔ kere bo i yoori i yarada, i mi dí
má nyinse.”

10

¹ M ninbaam, deke bo m koro i m ahore su la
ka, m minem Yisarelifom nya tiide, m nyemesere
lee sanɔa kere. ² M si tenle su ka bu nyunu aboro
ka bu su Nyeme atin n su nahore su, ama, bu si
má kabo bu yo na bu su i su. ³ Dama bu si má

atin bo Nyeme de minem ka ba yo sa bo i kɔ atin su i dɔ ni, ama, bu kpini bu tienɔgu atin wɔ, na bu su i su. Nyini ti, na ba kete Nyeme atin ni, ba de má kabo Nyeme ɲa bu yo sa bo i kɔ atin su i dɔ ni. ⁴ I ti nahɔre wɔ, ka Kristo juma n bo i yoori i ni, yiri kuunri nɔanie kpamaawa n kere nɔɔ a, adena sɔnɔ kere bo i yoori i yarada, Nyeme de i mi ka i yo sa bo i kɔ atin su i dɔ.

Sɔnɔ kere koro nya tiide

⁵ Moyisi yo kere fa kɔɔri kabo mine koro su nɔanie kpamaawa n su, na bu yo sa bo i kɔ atin su Nyeme dɔ, i ɲa, “Sɔnɔ kere bo i su nɔanie kpamaawa n kere su, i mi nyá ɲɔɔ.” ⁶ Ama, fa kɔ kabo yarada deɛ ti, na sɔnɔ yo sa bo i kɔ atin su Nyeme dɔ ni, i ɲa, “Má a sunsun u ahore su ka, ɲma fún kɔ aɲgoro a?” Nyini la ka, i kó fa Kristo jura ba lɛɛ. ⁷ Wara “Nma júra kunma ɲɔɲɔ n bo i la má awieeri nu a?” Nyini la ka, i kó fa Kristo fun fite bo ba wum n nu ba lɛɛ. ⁸ Deke bo i suse n la ka, “Nyeme nɔanie n waari má ni wɔɔ.

I wo u nɔɔ nu, ni u ahorembaa mmɔɔ su.” Yiri la labari n bo ya kaanri i n fa kɔ yaradayo su ni. ⁹ Nzen a teke u nɔɔ jɔjɔri minem nyunu ka, Yesu ti u Mibiɛ nahɔre su, na a yoori yarada u ahore su ka Nyeme tengeeri i yiwee n nu, a nyá tiide. ¹⁰ Dama sɔnɔ kere bo i yoori yarada i ahore su, ye Nyeme de i ka i yo sa bo i kɔ atin su i dɔ a. Na sɔnɔ kere bo i teke i nɔɔ jɔjɔri minem nyunu ka wɔ yo yarada, nyini ma i nya tiide a. ¹¹ Dama ba kere i Nyeme Jɔre Kadasi n nu ka, “Sɔnɔ kere bo i yoori i yarada, i mi dí má

nyinse.” ¹² Nyini ti, bo bu ti Yudafom, ni bo bu ti má Yudafom, bu la má kpakpaakinu, Micera kun ni ti bu kere Mibie a. Yiri ma minem kere bo bu bo fere i duma deke kpa bo i la má anusu n a. ¹³ Dama ba kere i Nyeme Jore Kadasi n nu ka, “Sɔnɔ kere bo i bo fereeri Mibie n duma, i mi nyá tiide.”

¹⁴ Tɔ, bu yo se koro bo fere i duma, má ka ba du mɔ ayo i yarada? Ye bu yo se koro yo i yarada, má ka ba du mɔ ati i jore? Ye bu yo se koro ti i jore a, má ka be adu mɔ akan i labari kpa n akere bu? ¹⁵ Ye bu yo se koro kan i labari kpa n kere minem a, má ka be asunma bu minem dɔ? Kabo ba kere i Nyeme Jore Kadasi n nu, ka, “Bo bu suba kan Nyeme labari kpa n ma ya ni, bu natiiri yo fie.” ¹⁶ Ama, má sɔnɔ kere soroori su deerɔ labari kpa n a, kabo Nyeme noanie kanfɔ Esaya yo seeri ni, ka, “Ya Mibie, nma ayo ya labari n yarada? Ai, be ade má i.” ¹⁷ Nyini ti, kana sɔnɔ ba yo Yesu Kristo yarada, má ka wɔ ti i labari kpa n ka, kana sɔnɔ gusu ba ti labari kpa ni, má ka be akan Kristo noanie ni akere i.

¹⁸ Ama, mine bo ba de má labari kpa ni, ba ti má jore n wɔ, nzen se a? Nahore, ba ti i. Dama ba kere i Nyeme Jore Kadasi n nu ka,
 “Ba bo ndoori abara aye durunya n kere nu,
 na bu noanie aju asien n kere su.”

¹⁹ M koro ka m bisa bekun ka, Yisarelifom ni, ba si má? Ba si. Moyisi du mɔ seeri ka, Nyeme nja,
 “M má am si kore fa kɔ minem bo bu ti má daanfɛ n nahore su ni,
 m má am fa yaa fa kɔ minem bo bu la má ngɔnlɛ n nju.”

20 Na Esaya ayo ahoresi, na wɔ se bu ka, Nyeme ɲa,

“Haari minem bo bu yo nienie má m busu ni, m ma ba ɲu m.

Na minem bo bu yo bisa má m busu ni, ma bo bu nu afa m ɲu akere bu.”

21 Na Esaya akaaki ase fa kɔ Yisarelifom su ka, Nyeme ɲa, “Ale kere bo i cin, m tenge m saa fere nyini minem n wɔ, ama, bu ti atii kekereke ni ketemafom wɔ.”

11

Kabo Nyeme ma Yisarelifɔ nbem diiri i ahɔɔma ni

1 M koro ka m bisa ka, Nyeme akete i minem wɔ, nzen se a? Ai, wɔ kete má bu e. Am ti fen. Mini Pɔɔlu ni m tii, m ti Yisarelifɔ ɔ. M ti Abraham busu nufɔ ɔ, m fite Benjamin dɛɛ lɛɛ anɔ n nu wɔ. 2 Nyeme akete má i minem bo i du mɔ yiiri bu ni. Am nya kan má Nyeme Jɔɔɛ Kadasi n nu fa kɔ i nɔanie kanfɔ Eliya n su, kabo i jarakiiri Yisarelifom Nyeme dɔ n wɔ, nzen se?

3 Bo i ɲa, “Micera, ba kun u nɔanie kanfom kere, ba kaaki afufu u yoowa yoobirim n kere, wɔ kɔ aka mini ɲgumi kpein wɔ, ye bu koro ka bu kun m gusu n a.” 4 Ama, Nyeme yo seeri i se wɔ? I ɲa, “Ma yaki Yisarelifom mine akpii nso afa ase Yisareli asien n su. Bere ye bu nya kutu má amɔɛ Baali n na bu su i a.” 5 Nyini dɛɛ ti, kisa gusu, i ti sɔ ɔ lɛɛ. Nyeme ayi Yisarelifom nu mine kaan sɔ ɔ, ye wɔ fere bu a, fa kɔ i ahɔɔma n dɛɛ ti.

6 I ahɔɔma n dɛɛ ti, ye wɔ yi bu a, má ka bu

sayoowa dɛɛ ti a. Nzen má i ti ka bu sayoowa n dɛɛ ti, má ahɔrɔma n ti má aceeri kun.

⁷ Nzu bekun a? Yisarelifom n anya má deke n bo bu kpiiri i busu ni, ama, minem n bo Nyeme yiiri bu ni, bere nyaari i a, na bo bu kaari n kere ahorembaa ayo kekereke. ⁸ I ti kabo ba kere i Nyeme Jore Kadasi n nu n wɔ, ka,

“Nyeme ama bu ahorembaa nonɔori,
na i ma bu nyumbaa ŋu má asi,
na i ma bu sui ti má asui,
haari ni nyuma.”

⁹ Na Feme Davidi ase ka,

“Ma bu cɛenkpiri diire diibiri n kaaki toroku ni diendie tara bu.

Ma bu kpaasi, na bu nya bu satie ŋkatɔ.

¹⁰ Ma bu nyunu si biri na bu koro ŋu má asi,
ma bu wi biri sanɔa kere sanɔa ka ba sɔ sɔori nonɔori wɔ.”

Kabo bo bu ti má Yudafom n anya tiide ni

¹¹ M koro ka m bisa ka, bo bu boori bu jaa kpaasi ni, bu yasu má kun wɔ? Ai, má sɔ. Ama, nahɔre, bu kpaasi sɔ n dɛɛ ti, ye minem bo bu ti má Yudafom nyaari tiide a, adena Yudafom ŋu i na bu si bu kɔre. ¹² Nyini ti, ba kpaasi n dɛɛ ti, ye durunya n nufom anya deke kpa beberebe a, ba fun deke n bo má bu nya i n dɛɛ ti, ye bo bu ti má Yudafom n anya deke kpa beberebe n a. Tɔ, nzen i ti sɔ, na Yudafom bo bu bá yo yarada n búka su, i yó deke kpa tara sɔ.

¹³ Kisa m sujɔɔ amberɛ bo am ti má Yudafom ni gusu dɔ a. Juma n bo Nyeme afa ama m ni, i sunmaari m ka m yo i jaramasa amberɛ bo am ti má Yudafom dɔ ɔ, nyini ti ye m fa m juma n fa

fɔ a, ¹⁴ na i má m tienɔgu minem si kɔrɛ, adena bu nbem nya tiide. ¹⁵ Dama sangá bo Nyemɛ keteeri bu ni, ye i ni durunya n nufom kere ayo kun a, ama, nzen i kaaki deeri bu bekun, i tí sɛ wɔ? I yó ka ba nya ɔɔɔ afite yiwee nu wɔ lɛɛ. ¹⁶ Nzen be faari i alembaa fɔfɔrɛ be fa yoori yoowa na i fa maari Nyemɛ, nyini la ka, i alembaa n kere ti Nyemɛ dɛɛ wɔ lɛɛ. Ye nzen baka bunlui n ti Nyemɛ dɛɛ, nyini la ka, i asambaa n kere gusu ti Nyemɛ dɛɛ wɔ lɛɛ.

¹⁷ Nahɔrɛ, Yisarelifom ti ka baka n bo i su suuwa kpa n wɔ, ye ba kpiɛ i asambaa ni nbem atu, na amberɛ ti ka boro baka bo i suuwa la má fanga, ye ba kpiɛ am asa baka n bo i su suuwa kpa n dɛɛ asambaa n su a, nyini ti, am ni baka n bo i su suuwa kpa n asambaa n kere sangá nya ɔɔɔ fite i bunlui n dɔ ɔ. ¹⁸ Nzen i nya ti sɔ, má am fa fɔ ka am ti kpa tara baka n bo i su suuwa kpa n ni i tii, dama má asambaa ni ma bunlui ni ɔɔɔ a, ama, bunlui ni ma asambaa ni ɔɔɔ a.

¹⁹ Beni, a se ka, “Ba kpiɛ baka n bo i su suuwa n dɛɛ asambaa n be, adena mini nya sasuubiri a.”

²⁰ Tɔ, i ti nahɔrɛ wɔ, Yudafom ayo má yarada n dɛɛ ti, ye Nyemɛ kpiɛeri bu jiiri n a, ye u yarada n dɛɛ ti, ye a jina jinaabiri n bo a jina n a. Nyini ti, má a yo kpirikoro, ama, si u ɔu sa. ²¹ Dama nzen Nyemɛ ayaki má baka kpa n ni i tii dɛɛ asambaa ni, beni, i bá yaki má wɔrɔ boro baka ni mmɔɔ dɛɛ asambaa ni. ²² M ɔa a ɔu kabo Nyemɛ yo sakpa barasu ni, ni kabo i di mine jɔrɛ na i cin bu sui ni anyumboro barasu ni. Minem bo bu yo má i yarada n ye i di bu jɔrɛ cin bu sui ni anyumboro n a, ama, wɔrɔ yiri, i yo sakpa ma u wɔ, nyini ti,

susu i sakpa n bo i yo ma u n su, má nyini, i kpíe wɔɔ mmɔɔ ji wɔ lɛɛ. ²³ Nzen Yudafom kaakiiri bu wo, na bu bá yoori Nyeme yarada, i koro fa bu sa bu woobiri dawa n su, dama i la yiko bo i koro yo sɔ. ²⁴ Ti fen. Wɔɔ mmɔɔ ni u tii ti ka boro baka asambaa n bo ba kpíe i afa asa baka n bo i su suuwa kpa n su wɔ. Nyini ti, a si ka Nyeme dɔ, i ti má kekereke na i káaki ba fa baka n bo i su suuwa kpa n asambaam n ba sa bu woobiri dawa n su bekun.

Kabo Nyeme si sɔnɔ kere anunfo n jɔre

²⁵ M ninbaam, asiri nu jɔre be yaa, ye m koro ka am si i a, adena má am yo am ηu kpiri ka am la si. Yiri la ka, kabo Yisarelifom nbem ayo bu ahorembaa kekereke ni, bu bíta i sɔ haari fa kɔ ju sanɔa bo minem bo bu ti má Yudafom kere bá ba Nyeme dɔ. ²⁶ Tɔ, i yó sɔ ɔ, na Yisarelifom kere bá nya tiide, kabo ba kere i Nyeme Jɔre Kadasi n nu ni, ka,

“Tiidefo ni fite Siyon mie kpiri n nu ba,

na i bá yi deke n kere bo i kɔ má atin su fa tu,

na i yó Jakɔbu busu nufom casi.

²⁷ Kabo m fá sesesu di i di ni bere lɛɛ, sanɔa bo m ba yiiri satie n bo i wo bu ηu ni.”

²⁸ Kabo Yudafom n akete labari kpa n ni, nyini ma ba kaaki Nyeme kpɔfom kisa n a, amberɛ bo am ti má Yudafom n dɛɛ ti. Ama, fa kɔ kabo Nyeme fereeri bu nam na i yiiri bu ni, bu ti i mine koroowam wɔ. ²⁹ Dama nzen Nyeme faari i aceeri fa ceeri mine nbem, wara nzen wɔ fere sɔnɔ, i kaaki má i sunsunni. ³⁰ Amberɛ, am yo keteeri Nyeme nɔanie n wɔ, ama, kisa, wɔ si am

aṅunfɔ, bere bo ba kete i noanie n dee ti. ³¹ Tɔ, kisa, i ti so ɔ, bere akete Nyeme noanie ni, dama Nyeme asi am aṅunfɔ, adena i awieeri su, na i bá si bere gusu aṅunfɔ. ³² Dama Nyeme abo sonɔ kere kun ka bu kere kete i wɔ, adena i awieeri su na i bá si bu kere aṅunfɔ.

Nyeme kansɔ jɔre

³³ Nahɔre, Nyeme alecira ni i si bo i la i n wo ngo. Kabo i di i jɔre ni, be koro fiiti má nu na i ti i bu, i atin n gusu kere, sonɔ koro si má i bu.

³⁴ Ba kere i Nyeme Jɔre Kadasi n nu ka, “Nma nya si deke bo i wo Micera n sunsunni nu a?

Wara nma nya koro tu i fɔ a?”

³⁵ “Nma nya ce Nyeme deke be a, adena Nyeme kaaki tɔ i mi kaari a?”

³⁶ Dama deke kere fite yiri do a, deke kere ti i dee wɔ, na deke kere bá yo i dee wɔ. Yiri ti ye ni ka ya kansɔ i saṅga kere saṅga. Ami.

12

Minem bo bu yo Nyeme sa koroowa n woowa jɔre

¹ Nyini ti, m ninbaam, m sere am wɔ, am nie kabo Nyeme asi am aṅunfɔ ayo am sakpa ni, na am fa am nju ma i, kabo má am yo yoowa fa ma i ni, ama, am toko la ngoɔ, na am kaaki Nyeme minem na am su i ni anyumbo. Nyini ti nyemesu bo i sun i nu a, dama wɔ yo sakpa ama am. ² Má am ma am woowa ti kabo durunya n nufɔm woowa ti barasu ni, ama, am kaaki am sunsunni fɔfɔre, na am kaaki am wo, nyini ma

am koro si Nyeme koroyanu sa a, bo i ti kpa, na i sun i nu, na i ti kabo i koro ka i ti ni.

³ To, Nyeme aceeri n bo wo fa ama m dɛɛ ti, m sutu am kɛrɛ fo ɔ ka, má be wura i ɲu kpiri tara kabo i ti ni, ama, sonɔ kɛrɛ sunsun na i niɛ i ɲu kabo i ti nahore su barasu, na i si kabo Nyeme ama i mi yarada barasu ni. ⁴ Adamande aɲuniembaa n ti mɔmɔ kun wo, ama, i la bue bue, i kɛrɛ ni i juma bo i yo i. ⁵ Ya gusu do i ti so ɔ lɛɛ, ya sunnu, ama, ya ni Kristo ayo kun n dɛɛ ti, ya ti aɲuniembaa mɔmɔ kun wo, na ya kɛrɛ ti aɲuniembaa n bue be bo ya buka ya beɲgu wo. ⁶ Nyini ti, aceeri barasu barasum bo Nyeme ahɔroma n dɛɛ ti na wo fa ama ya ni, am ma ya fa yo i juma ni. Nzen aceeri n bo Nyeme afa ama be n la ka i sukan Nyeme noanie ni, i ti ye ni ka i mi sufa yo juma, kabo i yarada n ti barasu ni. ⁷ Nzen Nyeme ama be aceeri ka i su amusui, i ti ye ni ka i mi sufa su. Nzen wo ma be aceeri ka i fa kere minem, i ti ye ni ka i mi sufa kere bu. ⁸ Nzen wo ma be aceeri ka i sutu minem fo na i wura bu kpekperɛ kekereke, i ti ye ni ka i mi sutu fo yo so. Nzen wo ma be aceeri ka i suyo sakpa na i ce minem aceeri, i ti ye ni ka i mi yo i ni ahorembaa kun. Nzen wo ma be aceeri ka i yo minem mofɔ, i ti ye ni ka i yo so ni anyumboro. Ye nzen wo ma be aceeri ka i suyo sakpa ma minem bo bu wo ahoresaaki nu ni, i ti ye ni ka i yo so ni ahorejo.

⁹ Am koro minem ni akunnu fofoe, am kpɔ satie, na am su deke bo i ti kpa su. ¹⁰ Am koro am beɲgu Kristofom ka am ti nibaam wo, na am bu am beɲgum ka bu tara am. ¹¹ Am su Mibie n ni anyumboro, má am yo nviɛya, am ma am

ahorembaa bi ni nyemesu. ¹² Am la ahoresi n dɛɛ ti, am ma am ahore jɔ. Saŋga kɛrɛ bo am sudi wahara, am mindi, na am sere Nyemɛ saŋga kɛrɛ ni anyumboro. ¹³ Am kpaaki am nɛngem nu ma Nyemɛ minem bo bu la má be ni, na am boro am nyi sude minem wɔfɔ.

¹⁴ Am sere deke kpa Nyemɛ dɔ ma minem bo bu kere am wuwuruwa ni, am sere deke kpa ma bu, má am sere deke tiɛ ma bu. ¹⁵ Nzen minem wo ahorejɔ nu, am ma am ni bɛrɛ kɛrɛ ahore ti jɔɔwa. Nzen minem wo ahoresaaki nu, am ma am ni bɛrɛ kɛrɛ wo ahoresaaki nu. ¹⁶ Am ma am ni am bɛngum saŋga wo ni sawɔrɛ, má am koro kpiri, ama, am fa am ŋu mata tarakam. Má am se ka ambɛrɛ ŋgumi la ŋɔnlɛ a.

¹⁷ Nzen sɔnɔ yo am satie, má am wɔrɔ tiɛ tɔ i kaari. Ama, am boro am nyi na am suyo sa bo i ti kpa, na sɔnɔ kɛrɛ ŋu i, na bu se ka i ti kpa.

¹⁸ Nzen am koro yo i, am boro am nyi na am ni sɔnɔ kɛrɛ tana ni laifɛ. ¹⁹ M danfo kpam, nzen be ayo am satie, má am wɔrɔ tiɛ tɔ i kaari, ama, am yaki i, na Nyemɛ cín i mi sui, dama ba kɛrɛ i Nyemɛ Jɔrɛ Kadasi n nu ka, Micɛra n ŋa, “Mini cín bu sui a, mini tó bu kaari a.” ²⁰ Ama, am yo kabo ba kɛrɛ i Nyemɛ Jɔrɛ Kadasi n nu ni, ka, “Nzen ahɔɛ ati u kpɔfɔ na a la diire, ma i na i di. Nzen nzuehɔɛ ati i, ma i nzue na i nu. Nzen a yoori sɔ, i ti ka a tɔrɔ sinmɔnɛ agɔ i mi tii su wɔ lɛɛ.” ²¹ Má a ma satie yoowa kunma u, ama, ma u kpayo n kunma satie ni.

13

Kabo i ti ye ni ka ya de tereterefɔm nɔaniɛ

barasu ni

¹ I ti ye ni ka sono kere de tereterefom noanie, bere bo bu la yiko na bu nie am su ni, dama yiko be wo ma bere bo i fite ma Nyeme do. Bo bu la yiko kisa n kere, Nyeme akpama bu a. ² Nyini ti, sono kere bo i keteeri tereterefom noanie ni, i mi sukete deke bo Nyeme akpama i n wo lee. Sona kere bo i yoori so, i sukpini suicin ma i nu wo lee. ³ Dama sono kere bo i yo sakpa soro ma tereterefom ni sere, ama, sono kere bo i yoori satie ni, yiri soro tereterefom n a. Nyini ti, nzen a koro ma ka a soro tereterefom ni, yo sakpa, na bu kansu u. ⁴ Nyeme ma tereterefom wo bere yo bu juma a, na bu buka u na a yo sakpa. Ama, nzen a yoori satie, ma sere ti u, dama Nyeme ama bu yiko ka bu yo bu juma ma yiri Nyeme a, na bu cin minem bo bu yo satie n sui. Bu cin ma minem sui ngbeenngbeen. ⁵ Nyini dee ti, i ti ye ni ka am de tereterefom n noanie, ma ka am soro ka bu cin am sui n ngumi dee ti a, ama, am ahore su, ni am sunsunni kere ka am yo so n dee ti a. ⁶ Nyini dee ti, i kaaki ti ye ni ka am to am lampom, dama gominam n yo bu juma ni anyumboro wo, Nyeme akere ka bu yo so a. ⁷ Nyini ti, deke bo i ti ye ni ka am yo ma sono kere ni, am yo ma bu. Am to am lampom kaari, wara nzen ba kpie am kaari be, am to i, sono kere gusu bo i ti ye ni ka am ma i jirima, am ma i.

Kabo i ti ye ni ka ya yo fa ko ya ben gum n do ni

⁸ Ma am ma be deke be kaari su am su. Deke bo wo yo daka ka am bita am ben gu kaari la ka, am sukoro am ben gu. Dama sono bo i koro i

ben̄gu, i mi su Nyeme nōanie kpamaawa n kere su wo lee. ⁹ Dama am si Nyeme nōanie maawam n kere, ka, “Má a saaki ajaa ciire, má a kun sōno, má a wo,” ni bo i na, “Má a ma u konviki wura be dēe nēnge nu,” haari ni bo ba ka n kere jina nyini nōanie kun ni su a, ka, “Koro u ben̄gu kabo a koro u nu ni.” ¹⁰ Sōno kere bo i koro i ben̄gu yo má i mi satie. Nyini kere ka nōanie kpamaawa n kere jina koro su wo lee.

Minem bo bu wo wein nu n jore

¹¹ I ti ye ni ka am yo so, dama am si kabo ahin san̄ga n ti ni. San̄ga n aju, i ti ye ni ka am ten̄ge, má am daafi. Dama san̄ga n bo ya nyá tiide n adodo, i waari má ka san̄ga bo ya du mo yoori yarada ni. ¹² Wo ka kaan na ya fīte kōngue nu, ale sucin lee. Nyini ti, am ma ya yaki awosin nu juma kere, na ya yo wein sayoowa, kabo luekun-fom sana bu biesoya nēngem na bu ko kun lue ni. ¹³ Ya wo wiesu wo lee, nyini ti, am ma ya woowa ko atin su. Má ya sudi ya tii, sunu nzan subo, suyo n̄gbēen̄gbēen, má ya suyo sakaraya, suyo konvikiya n̄gbēen̄gbēen, má ya sukpini jore, na má ya susi kore. ¹⁴ Ama, am ma ya fa ya Mibie Yesu Kristo n yo deke bo ya fa wura, kabo sōno fa sutura wura barasu ni, na má ya su ya n̄unie-mbaa koroowa n su.

14

Má a jaraki u ben̄gu

¹ Am de minem bo bu yarada ti má biiwa n ni am saa nnyo, má am se bu akuruwa fa ko deke n bo bu ci bu n su na am tanda bu ahore. ² Ma ya

fa i ka, nbem la yarada bo bu koro di deke kere bo bu koro, ama, nbem gusu wo bere, bu yarada ti ma biiwa, bu ciire la nie, bu di toro nyawa n ngumi wo. ³ Sono bo i di nie kere nie ni, ma i mi bu bo i di ma nie ni ngbeen. Sono kere gusu bo i di nyawa n ngumi ni, ma i mi jaraki bo i ci ma pui ni, dama Nyeme ade i a. ⁴ Woro la nma na a jaraki be dee gbefene? I dee tiengu mibie ni se ka i jina wara i kpasi a. I ti nahore wo ka i jina a, dama i mibie ni koro ma i jina nyunyumi a.

⁵ Bekun, mine nbem do, bu sunsun ka een nbem ti kpa tara nbem, ama, nbem gusu sunsun ka een n kere ti kun wo, be tara ma i benngu. I ti ye ni ka sono kere su kabo i sunsunni nu kere ka i ti kpa n su. ⁶ Sono kere bo i sunsun ka een be ti kpa tara een nbem ni, i mi koro ka i bu Nyeme dee ti, ye i yo so a, ye sono kere bo i ci ma pui n gusu, i mi koro ka i bu Nyeme dee ti, ye i yo so a, dama i da Nyeme asi fa ko diire n su, ye i nya di a. Sono kere gusu bo i di ma deke nbem ni, i mi gusu bu Nyeme dee ti, ye i yo so a, dama i mi gusu da Nyeme asi fa ko diire n su, ye i nya di a. ⁷ Sono be wo ma bere bo i koro se ka i wo i tii su wo wo, be gusu wo ma bere bo i koro se ka i wu i tii su yiwee. ⁸ Ai, nzen ya la ngoo a, Mibie n dee ti ye ya la ngoo a. Nzen ya wu gusu a, Mibie n dee ti ye ya wu a. Nyini ti, nzen ya la ngoo wara ya wu wo, Mibie n dee la ya a. ⁹ Dama nyini dee ti ma Kristo wuuri, ye i tengeeri i yiwee n nu n a, adena i yo sono kere Mibie, bo bu la ngoo n ni bo ba du mo awu n kere. ¹⁰ Woro la nma, woro bo a jaraki u benngu na a bu i ngbeen ni? A si ma ka ya kere ba jina

Nyeme nyunu na i dí ya jore? ¹¹ Kabo ba kere i Nyeme Jore Kadasi n nu ni, ka, Micera n ɲa,
 “Sɔnɔ kere bá kutu m nyunu,
 na sɔnɔ kere bá teke i nɔɔ se ka mini ti
 Nyeme a.

Kabo ma se ni, nyini wo bere a.”

¹² Nyini ti, ya kere bá kan ya sa bo ya yo i n kere kere Nyeme.

Má a yo sa bo i ma u beɲgu Kristofɔ bo i jaa na i kpaasi

¹³ Nyini ti, am ma ya yaki ya beɲgum jore kan, na má ya jaraki bu kun, ama, am ma ya sunsun kabo ya yo na má ya ma ya beɲgu Kristofom bo bu jaa, wara na bu kpaasi. ¹⁴ Kabo m ni ya Mibie Yesu ayo kun ni, nyini ma m si ka deke be mmɔɔ ni i tii ti má ciire n a. Ama, nzen sɔnɔ sunsun ka deke be ti ciire i dɔ, má i mi di i. ¹⁵ Nzen diire n bo a di i n dɛɛ ti, na a saaki u beɲgu Kristofɔ n ahore, nyini yiri, a suyo má koro sa læɛ. Kristo yo wuuri i dɛɛ ti wɔ, má a ma i mi ka ɲgbɛɛn, u diire n bo a di i n dɛɛ ti. ¹⁶ Má am ma be jɔjɔ jore tie fa kɔ deke kpa n bo am si i n su. ¹⁷ Dama kabo Nyeme nie i minem su ni, i ti má di ni nu jore wɔ, ama, i ti aceeri bo Awiewie Casi n afa ama minem wɔ, yiri la ka, ya yo sa bo i kɔ atin su Nyeme dɔ, ni tanalaifie, ni ahorejɔ. ¹⁸ Sɔnɔ kere bo i suuri nyini atin n su, na i su Kristo sɔ, i mi yo sa bo i sun Nyeme nu a, na adamande kansa i ka i ti sɔnɔ kpa.

¹⁹ Nyini ti, am ma ya boro ya nyi na ya su deke n bo i ma ya tanalaifie n su, na ya buka ya beɲgum, na ya kɔ mɔ ni ya nyemesu ni. ²⁰ Má

am saaki Nyeme juma ni, diire dee ti. Diire kere ti kpa a. Ama, nzen be di diire be na i ma i benngu bo i jaa na i kpaasi, nyini yiri, i ti ma kpa. ²¹ Nzen a di nie, wara a nu nzan, wara a yo nyini n be so, na i ma u benngu Kristof bo i jaa na i kpaasi, i ti ma ye ni ka a yo so. ²² Yarada n bo a yo i u ahore su fa ko nyini jorem su, ma i wo u ni u Nyeme aflen. Sono kere bo i yo sa bo i ko atin su, na i la ma sika i ahore su ka wo yo satie, i mi la terefie nahore su. ²³ Ama, sono kere bo i ba sudi diire barasu nbem na i yo sika, Nyeme adi i mi jore ajaraki i ka wo yo satie, dama diire n bo i sudi i ni, wo yo ma yarada. Deke kere gusu bo sono yo i, na i la ma yarada, i ti satie wo Nyeme do.

15

Ya yo sa bo i jo ya benngum ahore

¹ Yere bo ya la fanga fa ko yarada su ni, wo yo daka ka ya yo sawore ni bere n bo bu yarada la ma fanga ni, na ya buka bu, na ya dada bu ahore, ma ya yo sa bo i sun yere ni ya tii nu. ² Sono kere yo deke bo i sun i benngu nu, na i yo sakpa, na i ko mo ni i nyemesu ni. ³ Dama haari Yesu Kristo ni i tii ayo ma sa bo i sun yiri ni i tii nu, ama, i ti kabo ba kere i Nyeme Jore Kadasi n nu n wo, ka, "Nzukolee barasu n kere bo minem fa kpieri woro Nyeme ni, bu fa kpieri mini wo." ⁴ Deke n kere bo bu du mo kereeri i Nyeme Jore Kadasi n nu ni, bu kereeri i ka i kere ya a, adena ya la tama, dama deke bo ba kere i ni, nyini ma ya ahoresi a, na ya koro mindi a. ⁵ Nyeme ma ya mindi ni ahoresi a, yiri ma am la

anooſe ni am beŋgu a, kabo Yesu Kristo kereeri am ni, ⁶ adena am kere tien am noo fa anooſe, na am kansi Nyeme, ya Mibie Yesu Kristo Si.

Kabo minem bo bu ti má Yudafom gusu ade Kristo labari kpa n ni

⁷ Nyini dee ti, am de am beŋgum, ni am saa nnyo kabo Kristo ade am ni, nyini ma mine kansi Nyeme a. ⁸ Dama m suse am ka Kristo baari ka i ba buka Yudafom n wo, i yoori so n dee ti, nyini ma deke n bo Nyeme seeri ka i yo ma Yudafom nam n ayo biiwa nahore su n a. ⁹ Bekun i baari ka i ba buka minem bo bu ti má Yudafom wo, na bu gusu kansi Nyeme fa ko kabo wo si bu aŋunfo ni. Kabo ba kere i Nyeme Jore Kadasi n nu ni, ka, “Nyini dee ti, m kansi woro Nyeme, m kansi u duma minem bo bu ti má Yudafom nu, na m dí jue ma u.”

¹⁰ Ba kaaki akere i bekun ka, “Amberere bo am ti má Yudafom ni, am ma am ahore jo ni Nyeme minem bo wo yi bu ni.”

¹¹ Bekun, i ŋa, “Amberere bo am ti má Yudafom ni, am kansi Micera ni, na am ma daanfiem kere kansi Nyeme.”

¹² Na Nyeme noanie kanfo Esaya gusu ase ka, “Sono be bá fite Jese dee lee ano n nu, i ti kabo baka tie i bunlui su n wo, na i bá yo daanfiem kere femere, yiri má bu nya ahoresi a.”

¹³ Nyeme ma ya tama, m sere i ka i ma am ahorejo ni tanalaifie ko sin su, kabo am ayo i

yarada n dɛɛ ti, adena Awiewie Casi n yiko ma am tama bo i la má aɲusu.

Deke bo i ti na Pɔɔlu kerɛɛri ahin kadasi n ni

¹⁴ Tɔ, m ninbaam, m si tenle su ka am la wo kpa, na am la si dɔŋgu, na am kaaki koro fa tu am beɲgu fɔ. ¹⁵ Haari ni nyini mmɔɔ, ma fa ahoresi, ye m sukere ahin kadasi n fa ma am a, adena m tenge am ahin sam n su, dama Nyeme ayo sakpa ama m, ¹⁶ ka m yo Yesu Kristo amuisufɔ ma minem bo bu ti má Yudafom ni, adena m kan Nyeme labari kpa n kere bere bo bu ti má Yudafom ni, na Awiewie Casi n ma Nyeme de bu ka bu ti i dɛɛ mine casim. M yoori sɔ ni, i ti ka Nyeme sayoowa dɔŋguyofɔ n bo i yo yoowa bo i sun Nyeme nu ni. ¹⁷ Yesu Kristo dɛɛ ti, m la atin bo m koro fɔ fa kɔ Nyeme juma n bo wɔ fa ama m su. ¹⁸ Nahɔre, i la m sere na m kan sam bo nyɲgam ayo bu ni, má ka sam n bo Kristo ma ma yo bu ni ɲgumi, yiri la bo wɔ ma ma kan i nɔanie n akere minem bo bu ti má Yudafom ni, na ma yo alekutura sam, na ba de i nɔanie ni. ¹⁹ I ma m faari alekutura sam, ni Awiewie Casi n dɛɛ yiko nu fa yoori nyini juma n a. M boori i bu Yerusalem mie kpiri n nu wɔ, na ma bara aye akɔ aju haari Ilirikum awɔre n nu, na ma kan Kristo labari kpa n jɔre n kere akere bu. ²⁰ Deke bo m nyunu boro su agaya n la ka, m kan labari kpa n jɔre kere minem awɔrem n kere bo bu nya ti má Kristo duma ni, dama m koro má ka m ta be dɛɛ ataari su, ²¹ kabo ba kere i Nyeme Jɔre Kadasi n nu ni, ka,
 “Haari ni bo minem nya kan má labari kpa n kere má bu ni,

bu ηú i,
 haari ni bo bu nya ti má labari kpa ni,
 bu tí i, na bu sí i bu.”

Kabo Pɔɔlu ηa i koro ka i kɔ niε Romafŏm busu ni

²² Tɔ, nyini n kere dεe ti, sanɔa kere, má m koro ka m ba niε am busu wɔ, ama, m nya má atin. ²³ Ama, kisa, mie fɔfɔre be wo má bere bo m kɔ dɔ na m kɔ yo juma ahin awɔrem n nu, nyini ti, kabo má sanɔa kere na m koro ka m ba niε am busu ni, ²⁴ m la tama ka m ba susin kɔ Esipani dεe awɔre n nu, m jina am dɔ na m niε am busu, na m ni amberε nya tana, na am buka m na m koro kɔ ju deke bo m sukɔ ni. ²⁵ Ama, kisa yiri, m sukɔ Yerusalem mie kpiri n nu wɔ, m la buka be bo m kɔ fa ma Nyeme minem bo bu wo dɔ ni. ²⁶ Dama Kristofŏm bo bu wo Makedoniya ni, ni bo bu wo Akaya dεe awɔrem n nu ni, wɔ yo bu fie ka bu yiηi ηwaa, na m kɔ fa ma Nyeme minem bo bu wo Yerusalem na bu ti yaarifŏm ni. ²⁷ Bere ni bu tii afa sunsunni kpa anu ka Yerusalemfŏm kaari su bu su, dama Yerusalemfŏm du mɔ faari Nyeme deke kpa maari bere n bo bu ti má Yuda-fŏm n wɔ, nyini dεe ti, wɔ yo daka ka bere gusu nya durunya n nu nenɔe ma Yerusalemfŏm ni. ²⁸ Tɔ, nyini ti, nzen m koro yoori nyini juma n kere wieeri, na bu nya nyini buka n kere, m bá niε am busu, na m nyá sin kɔ Esipani. ²⁹ M si tenle su ka m baari, m fá deke kpa fite Kristo dɔ ba ma am.

³⁰ M ninbaam, kabo Ya Mibie Yesu Kristo wo ya dɔ, na Awiewie Casi n koro ya agaya n dεe ti, m sere am wɔ, ka am buka m na ya sere Nyeme ni

anyumboro, ³¹ ka i dé m fite Yudiya awore n nufɔ nbem bo bu yo má yarada n saa nu, na Nyeme minem bo bu wo Yerusalem n dé buka n bo m sufa ko ma bu ni. ³² Na nzen i ti Nyeme koroowa, na m bá am do ni ahorejo, na m ni ambere kere koro dada ya beŋgu ahore. ³³ Nyeme bo i ma tanalaifie n buka ya kere. Ami.

16

Kabo Pɔɔlu yoori Kristo jamam bo bu wo Roma mie kpiri n nu anse ni

¹ To, m koro ka am si ya niwa baabara n bo bu fere i ka Fibi ni, i yo Nyeme juma buka Kristo jama n bo i wo Kenciriya mie kpiri n nu n wo.

² Am de i kabo má am de Nyeme minem barasu ni, Mibie n dee ti, na am buka i ni deke kere bo i koro, dama yiri ni i tii abuka mine dongu, haari ni mini mmoo.

³ Am bisa Pirisila ni Akuyila dongu ma m. M ni bere sanja yo juma ma Yesu Kristo wo. ⁴ Bu yo toori bu ngoo maari m wo, nyini dee ti ye m da bu asi n a, má mini ngumi yo bu anse a, ama, Kristo jamam kere bo bu ti má Yudafom gusu yo bu anse. ⁵ Am bisa Kristo jama n kere dongu, bo bu tien bu noo bu dika ni.

Am bisa m danfo kpa Epanetosi n dongu ma m, yiri du mo yoori Kristo yarada Esiya dee awore n kere nu a. ⁶ Am bisa Mariya dongu, bo wo yo juma agaya abuka am ni. ⁷ Am bisa Andronikusi ni Juniya dongu, m lamoko Yudafom bo m ni bere yo woori dansaraka nu ni, bu la dumaye Kristo jaramasam kere nu, bere du mo yoori Kristo susufom ka, ye m nya ba

yoori a. ⁸ Am bisa m danfo Ampiliyatusi dɔŋgu, m Mibiɛ n dɛɛ ti, m koro i agaya. ⁹ Am bisa Wuribanisi dɔŋgu ma m, bo yiri ni yere sanɗa yo juma ma Kristo ni, na am kaaki bisa m danfo Sitakisi dɔŋgu. ¹⁰ Am bisa Apelesi dɔŋgu, bo wɔ yi i ŋu ka i ti Kristo susufɔ nahɔre su ni, na am bisa Arisitobulosi dikafɔm kere dɔŋgu. ¹¹ Am bisa m lamɔko Yudafo n bo bu fere i ka Herodiyon n dɔŋgu, na am bisa Naracisi dikafɔm bo bu ti Mibiɛ n dɛɛ minem n buka su. ¹² Am bisa Tirifena ni Tirifosa dɔŋgu, nbara nnyɔm bo bu yo juma ma Mibiɛ ni, ni m danfo Perisisi, yiri mmɔɔ ayo juma agaya ama Mibiɛ n ni. ¹³ Am bisa Rufusu dɔŋgu, yiri bo Nyeme ayi i ka i yo i juma n ni, ni i ni bo i ti mini mmɔɔ ni ni. ¹⁴ Am bisa ahin minem kere dɔŋgu ma m, bere la Asinkiritusi, ni Felegon, ni Heremesi, ni Patorobasi, ni Heremasi, ni ya ninbaam kere bo bu wo bu do ni. ¹⁵ Am bisa Filolokusi ni Juliya dɔŋgu, ni Nereyusi, ni i niemabara ni, ni Olimpasi, ni Nyeme minem kere bo bu wo bu do ni. ¹⁶ Am bisa am beŋgu dɔŋgu ni koro. Kristo jamam kere bo bu wo fen n bisa am dɔŋgu.

Awieeri su dɛɛ fɔtuuwa

¹⁷ M ninbaam, m sere am wɔ, am si am ŋu sa ni minem bo bu saaki kereewam bo am adu mo ade i ni, na bu fa kpakpaakinu ba ni, na bu ma minem kpaasi fa ko bu yarada n su ni. Má am dodo bu. ¹⁸ Dama nyini minem so, bu su má ya Mibiɛ Yesu Kristo su, ama, bu su bu dɛɛ kunnu koroowa su wɔ, na bu bo minem bo bu si má pui n anɔɔfiɛ, na bu dadaka bu. ¹⁹ Ama, ambere yiri, sonɔ kere ati kabo am ade Kristo nɔaniɛ nahɔre,

nyini dɛɛ ti, m ahore ajo ako asin su. M koro ka am la si fa ko deke n bo i ti kpa n su, ama, m koro ma ka am la si haari kaan so mmoo fa ko deke n bo i ti ma kpa n su. ²⁰ Nyeme bo i ma tanalaifie ni, i ce ma, i ma am yiko na am fun tientien Sitana nu mereki i. Ya Mibie Yesu Kristo buka am.

²¹ Timoti bo m ni yiri sanja yo juma n bisa am dongu, na Lukiyosi, ni Jason, ni Sosipateri, m lamoko Yudafom n gusu bisa am dongu.

²² Mini Teretiyusi gusu bisa am kere dongu, Mibie n dɛɛ duma n nu, mini ye Poolu ma m kereri ahin kadasi n sufa ma am n a.

²³ M awurufobie Gayosi bisa am dongu. Kristo jama n kere tien bu noo i dika a. Irasitisi bo i ti mie n nu nwaa bitafo ni, ni ya niwa Kuwatosi kere bisa am dongu. [²⁴ Ya Mibie Yesu Kristo buka am kere. Ami.]

Poolu dɛɛ awieeri su noanie ni

²⁵ Am ma ya kansi Nyeme. Yiri koro ma am jina fanga kenken fa ko Yesu Kristo labari kpa n bo m kaanri i jore na am ati i n su a. I ti jore bo bu yo fa fieri dada kere wo, ama, kisa wo fite fofoe nu. ²⁶ Yiri ye Nyeme noanie kanfom kereri i n a, na Nyeme bo i wo bere sanja kere n ama daanfie kere ati i, na ba de i, na ba yo i yarada.

²⁷ Nyeme ngumi la alecira a, yiri ti ye ni ka ya kansi i a, Yesu Kristo dɛɛ ti, sanja kere sanja. Ami.

ΝΥΣΜΕ ΙΟΡΕ ΚΑΔΑΣΙ
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022

fe36d0e6-2a60-5e15-8d1c-8bf275389598